


明史紀事本末

五





明史紀事本末

(五)

谷應泰編

明史紀事本末

卷三十

麓川之役

英宗正統二年冬十月。雲南麓川宣慰司思任叛。侵南甸州。洪武中。麓川思倫發內附。授麓川宣慰。按思倫所居。本麓川地。與緬接境。皆在金沙江之南。在元爲平緬宣慰司。思倫不言麓川。蓋已據緬爲己有。洪武中。大兵下雲南。改平緬爲麓川。平緬軍民宣慰司。麓川之名始見。至二十九年。平緬入貢。更立宣慰司。不相混。一未幾。思倫叛。黔國公沐英討平之。其後失官。改孟養宣慰使。以刁氏代之。正統初。宣慰使刁賓玉弱。不能輯諸夷。思倫發次子思任者。狡獪。踰父兄。差發金銀。不以時納。朝廷稍優容之。會緬甸危。思任侵有其地。遂欲盡復父所失故地。於是擁衆叛於麓川。先是。侵孟定灣甸。大殺掠。雲南總兵黔國公沐晟以聞。至是。復侵南甸。土官刁貢罕地。命沐晟遣官賈金牌信符諭還所侵地。思任不奉詔。三年冬十二月。思任侵掠騰衝。南甸。略取孟養地。刁賓玉奔永昌死。無嗣。思任屠騰衝。據潞江。仍自稱曰法法。滇王號也。中國遂訛爲思任發。云事聞。上遣刑部主事楊甯往諭之。不服。四年春正月。命鎮守雲南黔國公沐晟。左都督方政。右都督沐昂。率師討思任發。太監吳誠。曹吉祥監軍。兵至金齒。思任發遣其將緬簡。斷江立柵而守。師不得渡。初。思任未叛時。刁賓玉嘗遣詣晟。晟兒畜之。至是。晟遣指揮車琳等諭之。降。思任佯許諾。晟信之。無渡江意。刑部主事楊甯曰。不可。兵未加。稱降。此詐也。

懼有後悔。晟不從。檄甯督餉金齒。賊將緬簡數挑戰。政怒。造舟六十艘。欲渡江。晟不可。政不勝憤。夜獨率其麾下渡。擊緬簡。走之。破賊柵。賊奔景罕寨。指揮唐清擊敗之。指揮高遠等又追敗之高黎貢山下。共斬三千餘級。乘勝深入。逼思任上江。上江。賊重地也。遠攻疲甚。求援於晟。晟怒其違節制。渡江不遣。久之。以少兵往。至夾象石。不進。政渡江。追至空泥。知晟不力。援已。賊伏兵四起。出象陣衝擊。乃遣其子瑛還曰。若急歸。吾死分也。遂策馬突陣死。軍殲焉。晟聞敗。適春暮。慮瘴發。遂焚江上積聚。倉卒奔還永昌。至楚雄。上遣使者責狀。仍以四萬五千人助之。晟懼罪暴卒。思任發犯景東。孟定殺大侯知州刁奉漢等。破孟賴諸寨。降孟達等長官司。五月。以沐昂爲左都督。征南將軍。右都督吳亮爲副將軍。馬翔張榮爲左右參將。進討思任發。昂上潞江之捷。陞賞有差。

五年春二月。沐昂討麓川。軍抵隴把。去賊巢甚近。右參將都督僉事張榮先令都指揮盧鉞擊賊。大敗。榮棄符驗軍器遁。昂等不能救。師還。敕責沐昂等留昂鎮守。右都督吳亮左參將馬翔俱逮下理。秋七月。思任發屯孟羅大掠。據者章硬寨。沐昂率都指揮方瑛柳英等進克之。賊宵遁。威遠川土知州刁蓋罕戰威江。亦敗之。已而思任發遣流目陶孟忙怕等入貢。禮部議減其饗費。上曰。往來雖緩。我師而朕不逆詐。遂資而不宴。賜敕諭之。

六年春正月。命定西伯蔣貴爲征蠻將軍。總兵討麓川。思任發以太監曹吉祥監督軍務。兵部尙書王驥提督軍務。侍郎徐晞督軍餉。初。雲南總兵沐晟等議麓川險遠。攻之。非十二萬人不可。宜徵兵湖廣。川貴各委善戰指揮。分三道灣甸。芒布騰衝。刻期竝進。上下廷議。英國公張輔等言。分兵勢孤。彼或扞險邀我。

非萬全計。宜擇大臣往雲南專征。會思任發遣使謝刑部侍郎何文淵。上言麓川之在南陲。彈丸耳。疆里不過數百。人民不滿萬餘。宜寬其天討。官軍於金齒且耕且守。舜德格苗。不勞征伐。而稽首來王矣。大學士楊士奇主其說。張輔謂思任發世職六十餘年。屢抗王師。釋此不誅。恐木邦車里八百緬甸等覘視。窺覲示弱小彘。非策。上從之。遂命貴驥先赴雲南。復以副總兵李安參將宮聚領川貴兵。副總兵劉聚參將冉保領南京湖廣兵。大發兵十五萬。轉餉半天下。驥薦太僕寺少卿李黃郎中侯璉。楊甯主事蔣琳等爲參謀。陸辭上賜驥貴等金兜鍪細鎧弓矢蟒衣以行。侍讀劉球上疏言麓川荒遠偏隅。卽叛服不足爲中國輕重。而脫歡也。先併吞諸部。侵擾邊境。議者釋豺狼攻犬豕。舍門庭之近。圖邊徼之遠。非計之得也。請罷麓川兵。專備西北。不報。蓋王振專政。欲示威荒服也。十一月。定西伯蔣貴兵部尙書王驥等討麓川。大破之。思任發遁去。先是思任發率衆三萬至大侯州。欲攻景東威遠。兵部郎中侯璉都指揮馬讓。盧鉞擊之。驥等遂進至金齒。鎮康守陶孟刁門俸乞降。令右參將冉保以五千人入據之。因其衆破昔刺寨。移攻孟通。王驥誓師分三道進取。參將冉保自緬甸趨孟定。會木邦車里之師。驥同蔣貴中路至騰衝。內官曹吉祥副總兵劉聚等自下江夾象石合攻。徑抵上江。上江者賊砦所在也。攻二日不下。會天大風。驥命縱火焚柵。大破之。拔上江寨。賊千餘猶迎戰。官軍奮長戈蹴之。賊將刁放夏父子俱沒。刁招漢闔家自焚。生擒刁門項。先後斬五萬級。上江平。賊散走。大兵由夾象石下江通高黎貢山。道至騰衝。留副總兵李安戍之。王驥等取道南甸。至羅卜思莊。令指揮江洪等以八千人抵木籠山。思任發乘險以二萬人列七營相救。副總兵劉聚參將宮聚分攻之。不下。驥貴同奉御監蕭保自中路進。左右夾攻。敗之。斬數百餘。復乘

勝至馬鞍山。破其象陣。死者十餘萬。麓川大震。十二月。王驥等直擣巢穴。山周三十里。深堅塹廣。其東南依江壁立。以三千人探之。賊象陣伏泥溝。突起敗之。賊又自永毛摩尼寨至馬鞍山。伺我。後令都指揮方瑛以六千人攻拔之。瑛。方政子也。而右參將冉保從東路合木邦。車里大侯之兵先後斬三千三百九十餘級。於是進攻麓川。積薪焚其柵。思任發挈妻子閒道渡江走緬甸。焚溺數萬。驥等班師。鉞平麓川。進封蔣貴定西侯。王驥靖遠伯。以郎中侯璉。楊甯爲侍郎。餘陞賞有差。

七年冬十月。復命定西侯蔣貴。靖遠伯王驥征麓川緬甸。先是。思任發旣敗走緬。大軍遠復出爲寇。上謂驥曰。卿爲朕再行。遂起兵如前。復命驥等往討之。

八年春二月。定西侯蔣貴。靖遠伯王驥軍至金齒。遣諭緬甸。送思任發軍前。緬人佯諾不遣。驥曰。緬甸黨賊不可不討也。乃至騰衝。分爲五營。與蔣貴及都督沐昂分道竝進。木邦宣慰使統兵萬餘。駐於蠻江。潞覘我軍容。驥責以忠義。賜牛酒。遂感悅。初爲緬人擁衆大至。蔣貴率兵蔽江而下。焚其舟數百艘。大戰一晝夜。賊潰。思任發復遁去。俘其妻子。班師。蔣貴起自行伍。屢立顯功。與士卒同甘苦。凡出征衣糧器械。不役一人。臨陣身先士卒。敵皆披靡。必手擊殺數十人。不知書。然貴爲大將。拱手聽人指揮。無傲色。故所向成功。

九年春二月。王驥合木邦等諸部進兵緬甸。累捷。緬人用大金縷船載思任發。至江上。覘我。復匿之。欲以麓川子木邦。孟養。戛里。子緬甸。始獻。思任發。詭以思任子思機發致仇爲解。驥等乃縱兵擣思機發寨。俘其妻子及從賊九十餘人。象十一事。聞上詔驥還京。然思機發尙竊據孟養。負固不服。

十年冬十二月。雲南千戶王政奉敕幣諭緬甸宣慰男卜刺浪馬哈省。索思任發。未卽遣。適晝晦二日。術者曰。天兵至矣。卜刺浪馬哈省懼。以思任發及妻孥部屬三十二人付政。思任發不食。垂死。政遂斬首函獻京師。

十三年春三月初。思機發復據孟養地爲亂。屢諭不從。復命靖遠伯王驥提督軍務。都督宮聚爲總兵。張軌。田禮爲左右副總兵。方瑛。張銳爲左右參將。率南京。雲南。湖廣。四川。貴州土漢軍十三萬討之。以孟養舊宣慰刁孟賓爲嚮道。又敕木邦。緬甸。南甸。千崖。隴川宣慰使刁蓋發等各輸兵餉。命戶部右侍郎焦宏督餉雲南。十月師抵金沙江。賊柵西岸以拒。驥造浮梁以渡。攻破之。乘勝進至孟養。賊斂衆據鬼哭山及芒崖山等寨。皆攻拔之。斬獲無算。貴州都指揮使洛宣。九谿衛指揮使翟亨皆戰死。思機竟失所在。或謂死於亂兵也。王師踰孟養至孟那。孟養在金沙江西去麓川千餘里。諸部皆震怖曰。自古漢人無渡金沙江者。今王師至此。真天威也。驥還兵。部落復擁思任子思祿爲亂。攻銀起莽。敗之。復據孟養地。驥等慮師老。度賊不可滅。乃與思祿約。許以土目得部勒諸彝。居孟養如故。復與立石金沙江爲界。誓曰。石爛江枯。爾乃得渡。思祿亦懼聽命。乃班師以捷聞。詔增驥祿。賜鐵券。子孫世襲伯爵。

谷應泰曰。麓川地接平緬。雖彈丸黑子。然固皇輿以內地也。洪武初。思氏失官。刁氏逐思。據有平緬。至正統時。刁又衰弱。思氏復振。賓玉走死。思任坐大。且爭衡上國矣。蠻彝自相攻殺。趙奢所謂兩鼠鬪穴。天子不必問也。天使亟行。諂讓數四。而尉陀箕踞。初無降意。子陽不省。乃更治兵。倔強如是。而討逆之旗不見於金齒。問罪之旅不戰於昆池。尙謂國有人乎。且宣帝卽位。已棄交趾。新君踐祚。又廢麓川。雲貴二廣土

彝環疆動以百計。溪蠻苗峒列處內地。耕牧成羣。麓川不逞。既有徵矣。異類襲是跡而動。誅戮子弟。憂患長老。甚者屠掠郡國。并吞諸部。再復數年。芻醬不見於番禺。邛杖不來於大夏。使斷牂牁之北。地盡越巂之東矣。爾時而欲用兵。敗固不測。勝亦大創。且高帝定雲南。思氏竊發。沐英以三萬騎破其三十萬衆。思然後俯首歸命。旣而刁氏又叛。沐春疾驅力戰。擒斬諸刁。納其故主。其諭傅友德曰。雲南雖平。尙煩區置。靄翠諸地。不盡服從。雖有雲南。亦難守也。蓋小懲大戒。柔遠之良規。一勞永逸。王師之勝算。故殷興夏緒。必克鬼方。蜀出中原。先渡瀘水。控遠與綏。邇不同功。討貳與貪。功不同道也。西楊主議。舜德格苗。劉球上書。不稱荒服。或亦朝多濁亂。內憂羣小。北敵陸梁。外憂方大。文子不願楚敗。山濤方懼吳亡。大臣之用心。固如是耶。若乃長駕遠馭。則亦公孫宏之罷朔方。淮南安之諫閩越者也。蔣貴王驥初下麓川。三路分進。斬首三千。思任竄緬。僅以身遁。再攻平緬。五營竝進。焚其援舟。思任父子又竄孟養。然而緬人內懼。傳首京師。勒石金沙。誓臣石爛。此亦勳著燕然。功高銅柱。豈僅唐蒙夜郎。相如邛笮者乎。然史稱其起兵十五萬。轉餉半天下。冒躡五等。橫被冕玉。嗟乎。陳湯貪黷。曹翰凶殘。武臣之故態。而屯守之說不行。飛輓之繁。不給。此則其智遜金城。而功比貳師者已。

卷三十一

平浙閩盜

英宗正統七年十二月。麗水盜陳善恭。慶元盜葉宗留。合衆盜福建寶峯場銀冶。命浙江福建有司捕治。

之。

十二年春二月。葉宗留聚衆盜掘少陽坑數月。計所獲微甚。棄去。九月。率衆之雲山。遍掘諸坑場。無所得。還慶元。居數日。往政和掘少亭坑。亦不給用。謂其徒曰。以吾之衆。卽索金於市易耳。何至自疲山谷。閒常苦不給也。衆從之。時已數百人。遂掠政和縣及村落。還慶元。號召得千餘人。遣召龍泉良葛山人葉七爲教師。訓練武藝。由浦城劫建陽。所過焚掠。從者益衆。遂掠建甯。官民皆逃匿。分衆截車盤嶺。鉛山惴恐。行旅斷絕。

十三年夏四月。福建沙縣鄧茂七反。自稱閩王。命都督劉聚爲總兵。陳榮爲副總兵。陳詔。劉德新爲左右參將。僉都御史張楷監軍討之。茂七江西建昌人。初名鄧雲。豪俠爲衆所推。殺人亡命入閩。至甯化縣依豪民陳正景。易名茂七。聚衆集會。常數百人。遠近商販至皆依之。漸恣橫。頤指殺人。先是御史柳華按閩。檄各郡縣令村落各置隘門望樓。編鄉民爲什伍。茂七與弟茂八皆編爲長。嘗佃人田。例輸粟。主家餽少物。茂七令毋餽。而田主自往受粟。田主訟之。不受縛。乃下巡檢追攝之。因殺弓兵數人。聞於上官。調官軍三百人與之格鬪。殺傷略盡。懼討。遂刑白馬。歃血誓衆。舉兵反。游兵皆舉金鼓器械應之。烏合至萬餘人。自稱閩王。與正景率黨劫上杭。還攻汀州。爲推官王得仁所敗。三戰。正景被擒送京師。斬之。獨茂七黨盛不可制。至是。率其黨據杉關。劫商旅。遂攻光澤縣。大掠。順流下邵武。官民悉逃匿。至順昌。據之。賊去。邵武官民始復入城。順昌官民亦入保邵武。時福建參政宋彰交趾人。與中官多故。舊侵漁萬計。賄王振。得爲左布政使。抵任。將責償焉。小民苦爲所迫。於是尤溪爐主蔣福成號集居民。貧人無賴者悉歸之。旬日有

衆萬餘。遂襲尤溪。據之。與茂七聲相聞。將劫沙縣及延平。延平上其事。御史丁宣偕藩臬諸使至延平。遣同知鄧洪等帥兵二千往沙縣勦之。福成遂與茂七合。官軍殲焉。丁宣乃遣使招諭令解散。得免死。茂七笑曰。吾豈畏死求免者。吾取延平。據建甯。塞二關。傳檄南下。八閩誰敢窺焉。殺贖書使者。據貢川及玉臺館。締置里圖甲役。遂據沙縣。勢益猖獗。御史張海始至延平。遣都指揮張某率兵四千往勦之。行二十里。至雙溪口。道隘。賊僅二十餘人。伏左右村店中。俟兵過。且盡。都指揮後殿至。賊伏猝起。舉排柵塞道。前驅不可返。從兵不數十人。賊遂搏都指揮并其從兵。皆殪之。前驅兵覺。還禦之。無及。賊登山擁衆喊聲。官軍大潰。茂七進攻延平。張海登城諭之。有緋衣賊曰。我曹苦富民魚肉。有司不我直耳。如朝廷宥我。且立散。乞免徭三年。都指揮范真等戰於城外。衆潰。真與指揮彭璽等俱死。御史上其事。請兵討賊。上乃召都御史張楷至。面諭以閩賊猖獗狀。令偕都督劉聚。陳榮等往討之。九月。張楷等師至南畿。分遣劉得新率兵由江西道建昌會邵武。楷率兵由浙入閩。十一月。指揮戴禮擊葉宗留斬之。禮與都督陳榮亦戰死。初。張楷奉命討鄧茂七。至廣信。以葉宗留道梗。留不敢進。福建遣使促楷師。浙江藩臬諸司請楷便宜移兵擊宗留。江西御史韓雍亦言宗留近在咫尺。門庭之寇。皆國家事。豈可畫疆而計耶。楷不知所從。指揮戴禮願往勦之。楷乃命率兵五百往。都督陳榮謂楷曰。受朝命討賊。今延平事急。而鉛山不通。大軍密邇。二寇逗遛不進。乃遣一步將往。朝廷知之。何所逃罪耶。楷然之。遣榮以二千人率禮等往。禮先驅與賊遇於黃柏鋪。麾兵擊之。死傷相半。宗留衣緋。率衆前中流矢死。官兵不知爲宗留也。賊退奔入山。復擁葉希八爲渠魁。劫車盤嶺。悉衆駐十三都。欲回浦城。會陳榮兵亦至。併戴禮軍搜山。至玉山十二都中伏。榮禮

皆死。葉希八焚浦城。還龍泉。衆數萬人。屯雲和。麗水。陶得二。陳鑑。胡俱率衆從之。楷聞報。方益兵進。而劉得新已率江西兵敗茂七於建陽。道始通。楷遂閒道入閩。會劉得新等取道走建甯。十二月。守備處州。監察御史朱瑛計擒賊黨周明松等尸於市。時葉宗留黨周明松等四出剽掠金華。武義。崇安。鉛山諸縣。朝廷慮其與閩寇合。命瑛及中官分守要地。瑛榜諭脅從。示以禍福。降者甚衆。以計生致明松等數人。械於慶元。諜報賊首黑面大王領衆三萬來劫明松等。中官大懼。欲走。瑛不爲動。立誅明松等尸於市。賊聞之。遂巡遁去。鄧茂七遣別將陳敬德。吳都總等由德化。永春。安溪寇泉州。知府熊尙初逆戰於五陵坡。兵敗被執。不屈。死之。以建甯知府張瑛爲福建右參政。鄧茂七以二千餘人攻建甯。瑛率建安典史鄭烈。鄉兵吳保等合都指揮徐信分道乘霧襲斬五百餘。拔其寨。故有是命。

十四年春正月。上以閩師久無成功。命甯陽侯陳懋爲征南將軍。保定伯梁瑤。平江伯陳豫爲左右副總兵。都督范雄。董興爲左右參將。尙書金濂總督軍務。太監曹吉祥。王瑾監軍。御史張海。丁宣紀功。率京營及江西。浙江諸處大軍討之。未至。茂七等攻延平久。餘賊至太平驛。副使邵宏譽等率兵與賊戰。射死百餘人。軍士亡者倍之。以捷聞。初。賊於近城五里許斷橋爲守。道阻不通。劉得新旣敗。賊張楷乃遣使諭之。降其黨黃琴等三十餘人。令復業。禁諸民不許復私讐。建陽路旣通。沙縣賊首張蘇孫至延平降。又引從賊羅汝先等詣楷。願殺賊贖罪。且云賊敗後皆據險自衛。必欲取之。吾爲公說令攻城。公悉大軍擊之。吾爲內應。可覆也。許之。賊首劉宗。羅海。郎七等俱茂七僞將。掠財聚陳山寨。黃琴等計擒之。詣軍門。械送京師。楷遂益兵趨延平。遇賊攻城。擊殺千餘人。賊衆稍卻。茂七等復移兵寇建甯。參政張瑛與賊戰。死之。於

是楷等還建甯。賊遂退保陳山。二月，賊復下山攻延平。蓋張繇孫羅汝先誘之出也。楷以浙江軍伏後坪。南京軍伏後洋。江西軍伏沙溪之南。而以福建軍素爲賊所易者出城挑之。賊乘浮橋竟淮。伏起。礮作。合擊。大破之。官軍乘勝進殺。擒數十人。茂七中流矢死。乃斬其首函之。馳露布以捷聞。而甯陽侯陳懋等天兵亦繼至。楷等至順昌。諸處慰撫居民。餘賊復擁茂七兒子鄧伯孫聚後洋。或散走。各分據山砦。平江伯陳豫等分道捕之。賊據九龍山。楷遣兵二千出山後。戒之曰：「明日賊必空寨攻我。若疾入其寨，據之。比旦賊視營兵少，果至溪上，無筏而還。山後兵已據其寨，驚潰。」三月，指揮王鉞捕賊於高陽里，獲女賊廖氏，僞號女將軍廖氏。甌甯人被掠至鄧伯孫所，妖淫善幻，尤驍捷。兵敗歸母家，獲之。諸將各先後捕獲從賊首數多，俱檻送邵武。大軍至邵武，皆斬之。璽書至，褒諭諸將以降賊黃琴爲主簿，羅汝先爲縣丞，賞其誘賊功也。餘侯班師論功，令陳懋等畱勦閩賊未盡者。張楷還師討處州賊懋等，乃立賞格，能自擒殺來降者，與斬敵同。賊將張留孫者驍勇善戰，茂七起事多倚之。茂七死，仍從鄧伯孫。千戶龔遂榮僞貽留孫書，若素有約者，佯使諜誤致之伯孫。伯孫果疑留孫殺之。由是賊黨人人自疑，棄伯孫來降。遂進兵沙縣，破貢川掛口。陳山諸砦，執伯孫送京師，斬之。左都督劉聚兵至南平。順昌甌甯擒餘黨六十三人，斬首無算。諸將先後擒斬招撫略盡。八閩悉平。懋等乃班師。張楷、劉聚等還師討處州寇。先是，葉希八等據雲和山中數月，謂其黨曰：「山中出掠不便，不若由朱湖盡掠府城，乃結砦駐鮑村，取貨於義烏，掠人於松陽。官軍雖衆，不能越馮公嶺迫我矣。衆從之。」遂掠處州。守臣遣使從溫台告急於杭州。御史命都指揮沈鱗參議耿定僉事王定帥兵四千至處州擊之。諸守臣復遣使詣省告急。御史盛琦、黃英先後以聞。朝廷命

都指揮徐恭爲總兵。孫鏜、陶瑾爲左右參將。工部尚書石璞督諸軍討之。會沈麟、耿定、王晟率千戶楊清等擊賊。麗水敗沒。徐恭帥兵二千馳至處州。亦守城不敢出。賊攻處州。聲言取金華。時楷等兵尙未至。葉希八分犯江西廣信境。永豐知縣鄧顥死之。時賊侵上饒。顥奉張楷檄禦卻之。賊大至。或勸其走。不聽。遂被執。不屈。罵賊死。陳鑑胡破松陽、龍泉、屯金山巖。分劫青田、武義、義烏、東陽。自號太平國王。改泰定元年。麗水縣丞丁甯以老人王世昌等入賊巢。諭鑑胡降之。進甯處州府同知。世昌等授巡檢。鑑胡至京。錮錦衣獄。有詔鑑胡擬死。免其妻子。民兵張祐、王應參、王金禮等亦殺賊千餘人。獲皮甲八百。上俱授巡檢。責尙書石璞總兵。徐恭玩寇。五月。張楷入浙。至衢州。僉事陶成往迎之。陳危急狀。時處州城中乏食。諸將登陴而泣。楷分兵水陸竝進。至蘭溪。御史黃英、林廷舉來會。請速進兵。至金華。令軍中製竹筥數百。面筥如牌製。糊以紙。畫獸形。可禦賊槍。乃兼程進。至處州界。知府陸鍾等來迎。至銅山寺。駐師。賊陽遣人求撫。實覘之耳。遂給榜示付之。去時。官兵陣於平地。賊衆萬人。出山索戰。官兵分三陣。賊攻中軍。楷等令回趣馬軍射之。死者三百餘人。左右合擊死者又二百人。持槍者多爲竹筥所制。蓋槍入竹隙。急不得出。悉被擒獲。賊敗潰。斬首六百餘級。生擒百餘人。初。賊勢甚迫。僉事陶成請招諭之。乃從僕隸四五人徑抵賊巢。諭以禍福。言詞懇惻。賊黨環動。悚聽。多率其黨降。惟陶得二殺使者。引餘黨入山中。至是。千戶沈俊謂其部下多麗水鮑村人。父子兄弟陷賊中者衆。有何受等三人自言於陣前。見其親屬。今欲招撫。請以此三人往可得也。楷從之。令齋榜入山。反覆譬曉。詞亦過徇。楷至。以老母百口與誓。陶得二乃先出見。楷優賞加賚。令歸山中。同賊首葉希八、楊希陶、秉倫率其黨十餘人來見。楷納其降。給帖令復業。始知前

黃柏鋪緋衣中流矢死者卽葉宗留也。明日受等三人又招得賊首余海四、陳川十、余卞等三百餘家出降。亦許令復業。六月上下璽書諭張楷相機勦撫之宜。楷等奏報賊前後聽招撫復業者九千餘家。男婦二萬餘人。疏旣上。賊首陶得二等回山復疑懼。擁衆如故。欲以書招楷入。楷亦復書諭之。

景帝景泰元年五月。賊在慶元大社者又出掠麗水。青田諸縣。進攻武義。武義無城郭。副使陶成力禦之。賊銳甚。麾下勸稍卻以避其鋒。成不可。帥兵更進戰。自辰至申。俄而城中火起。兵潰。成策馬突陣死之。成有威惠。屢捍海寇有功。至是死。民思之不置。未幾復得璽書諭楷等將已降賊令所撫處。廣布恩信。戒官吏勿相激擾。不聽撫者調兵勦滅。楷復遣郡邑丞倅等官賚入山再招之。陶得二等始聽招。盡焚其砦。出降。餘黨因陶得二降。悉解散復業。所司隨在撫諭之。楷等乃班師露布以聞。楷還京。會帝北狩。舊經事大臣多陷沒。廷議楷無功。追論下於理議。上以寇平功贖罪得放歸。

二年秋七月。鎮守浙江福建侍郎孫原貞以處州盜平。奏析麗水、青田二縣置雲和、宣平、景甯三縣。福建置永安、壽甯二縣從之。

谷應泰曰。浙東入閩道險而狹。迤邐千里。山勢嶮巖。灌木蒼翳。糾紛盤互。不逞之徒往往跳穴其閒。內可以聚糗糧。下可以伏弓弩。急可以遠遁走。緩可以縱剽掠。以故浙閩多寇盜。好作亂。長吏不敢問。將兵者難撲滅。地險然也。又況括蒼諸坑。頗產貢金。椎埋嗜利者因緣爲奸。趣之如鶩。聚衆益多。以故慶元、葉宗畱以千餘人攻政和。此亂之始也。然其由浦城劫建陽。則自浙犯閩。攻上饒。破永豐。則自浙犯江。而葉希八又焚浦城。屯雲和。麗水。則自閩還犯浙矣。其時閩地鄧茂七反甯化。蔣福成反尤溪。莫不據地稱王。摧

鋒陷敵。擁衆萬餘。轉戰數郡。比之於浙。爲尤劇焉。昔武帝之時。東甌閩越。治兵相攻。遼闊阻深。尙煩漢救。而使其合兵連橫。侵暴吏民。咸陽雖遠。可付之度外耶。於是中丞張楷。銜命督師。劉聚。陳榮。分兵進討。旣而榮旣敗沒。賊又滋蔓。宗留雖死。明松復來。希八未亡。鑑胡更作。何異淮裔煽亂。徐戎竝興。甲午祠兵。魯師欲潰。乃始一侯二伯。授鉞南征。六將兩璫。協謀東伐。猶之赤眉敗禹。更命馮異。盧循摧毅。還仗宋公。雖望桑榆之收。亦苦潢池之酷矣。所幸者閩寇自閩。浙寇自浙。地雖旁掠。勢不交通。取虞取虢。此成擒耳。假令浙寇北下。婺州東收。廣信閩寇。南驅光澤。西薄建昌。聯師有犄角之形。事成有中分之約。則八閩旣困。江浙亦搖。而更待朱瑛。橫格鉛山。中官分守要地。不已晚乎。雖其後福成茂。七先後竝殲。希八鑑胡同歸。款附東陵。渠帥次第盡矣。而獨參政宋彰者。輸賂王振。責償閩閩。民苦誅求。盜所自起。五年之閒。村落爲墟。赤羽徵兵。青芻轉餉。土木之妖。先萌內地。奸闖柄政。禍如是乎。至於陶得二屢叛而貸死。張楷捷奏而下獄。蓋二以楛庇獲全。楛以振黨受過。刑賞失中。亦云忒矣。若夫孫原貞。條奏浙增雲宣三邑。閩置永壽二縣。犬牙相錯。馭險之規也。但磴道素多。棹枒羣盜。易於伏莽。黃門鬚髮。蝨乃不生。馬援伐樹。寇遂永絕。原貞之策。乃更不及此耶。

卷三十二

土木之變

正統八年癸亥夏四月。瓦剌太師順甯王脫歡死。子也先嗣。自脫歡殺阿魯台。併吞諸部。勢浸彊盛。至也

先益橫。屢犯塞北。邊境自此多事。

十二年春正月。巡撫宣大僉都御史羅亨信上言。瓦剌也先專候釁端。圖入寇。宜預於直北要害增置城衛。土城備之。不然。恐貽大患。奏聞。兵部尙書鄺埜畏王振不敢主議。時參將石亨欲以大同四州七縣之民三丁籍一兵。又有敕令軍餘盡撥屯種量畝起科。亨信奏言。瓦剌方驕。邊民疲甚。兼以邊地饑薄。若如所言。是絕衣食而逼其竄也。且當今事勢。正宜布恩信。以結人心。苟絕其衣食。未有得其心者。詔從之。十四年春二月。也先遣使二千餘人進馬。詐稱三千人。王振怒其詐。減去馬價。使回報。遂失和好。先是也先遣人入貢。通事輩利其賄。告以中國虛實。也先求結婚。通事私許之。朝廷不知也。至是貢馬。曰。此聘禮也。答詔無許媼意。也先益媿忿。謀寇大同。夏六月丙辰夜。雷電大震。風雨驟作。謹身殿火起。延奉天。華蓋二殿。奉天諸門皆燬。自王振擅權。災異疊見。振略不警畏。很恣愈甚。且諱言天變。時浙江紹興山移於平地。官不敢聞。又地動。白毛遍生。奏入不省。陝西二處山崩。壓沒人家數十戶。山移有聲。三日不絕。移三里。不敢詳奏。黃河改往東流於海。淹沒人家千餘戶。又振宅新起。未踰時。一火而盡。南京宮殿火。是夜大雨。殿基上荆棘二尺高。始下詔赦天下。秋七月。也先圖犯邊。其勢甚張。侍講徐理語其友劉溥曰。禍不遠矣。亟命妻子南歸。皆重遷。有難色。理怒曰。爾不急去。不欲作中國婦耶。乃行。八日。也先大舉入寇。兵鋒銳甚。大同兵失利。塞外城堡所至陷沒。邊報日至。乃遣駙馬都尉井源等四將各率兵萬人出禦之。源等既行。太監王振勸上親征。命下二日。卽行事。出倉卒。舉朝震駭。命太師英國公張輔。太師成國公朱勇率師以從。戶部尙書王佐。兵部尙書鄺埜。學士曹鼐。張益等扈征。吏部尙書王直及大小羣臣伏闕懇留。不

允十七日命太監金英輔郟王居守。每旦於闕左門西面受羣臣謁。見遂偕王振并官軍五十餘萬人至龍虎臺駐營。方一鼓衆軍訛相驚亂。皆以爲不祥。明日出居庸關。過懷來。至宣府。連日風雨。人情洶洶。聲息愈急。隨駕諸臣連上章留振怒。悉令掠陣。未至大同。兵士已乏糧。僵屍滿路。寇亦佯避。誘師深入。八月戊申朔。至大同。振又欲進兵北行。鄺堃請回鑾。振矯旨令與王佐隨老營。堃乘馬蹀躞而前。墜地幾殆。王佐竟日跪伏草中請還。欽天監正彭德清斥振曰。象緯示警。不可復前。若有疎虞。陷乘輿於草莽。誰執其咎。學士曹鼎曰。臣子固不足惜。主上係天下安危。豈可輕進。振怒曰。儻有此。亦天命也。於是井源等報敗。鍾至會暮。復有黑雲如繖罩營。雷雨大作。王振惡之。會前軍西甯侯朱瑛。武進伯朱冕。全軍覆沒。鎮守大同中官郭敬密言於振。勢決不可行。振始有還意。明日班師。大同總兵郭登告學士曹鼎等。車駕入宜從。紫荆關庶保無虞。王振不聽。振蔚州人。因欲邀駕幸其第。旣又恐損其禾稼。行四十里。復轉而東。還至狼山。追騎且及。十三日庚申。遣朱勇等率三萬騎禦之。勇無謀。進軍鷓兒嶺。敵於山兩翼邀阻夾攻。殺掠殆盡。是日駕至土木。日尙未晡。去懷來僅二十里。衆欲入保懷來。以王振輜重千餘兩未至。留待之。鄺堃再上章請車駕疾驅入關。而嚴兵爲殿。不報。又詣行殿力請。振怒曰。腐儒安知兵事。再妄言必死。堃曰。我爲社稷生靈。何得以死懼我。振愈怒。叱左右扶出。遂駐土木。旁無水泉。又當敵衝。十四日辛酉。欲行。敵已逼。不敢動。人馬不飲水已二日。飢渴之甚。掘井深二丈。不得水。其南十五里有河。已爲也先所據。也先分道自土木傍麻谷口入。守口都指揮郭懋拒戰終夜。敵益增。時楊洪總兵在宣府。或勸洪急以兵衝敵圍。駕可突出。竟閉城不出。十五日壬戌。敵遣使持書來以和爲言。遂召曹鼎草敕與和遣二通事與北使偕去。

振急傳令移營踰塹而行。迴旋之閒行伍已亂。南行未三四里。敵復四面攻圍。兵士爭先奔逸。勢不能止。鐵騎蹂陣而入。奮長刀以砍大軍。大呼解甲投刀者不殺。衆裸袒相蹈藉死。蔽野塞川。宦侍虎賁矢被體。如蝟。上與親兵乘馬突圍不得出。被擁以去。英國公張輔。尙書鄺埜。王佐。學士曹鼐。張益而下數百人皆死。從臣得脫者蕭惟禎。楊善等數人。軍士脫者。踰山墜谷。連日飢餓。僅得達關。羸馬二十餘萬。并衣甲器械輜重盡爲也先所得。太監喜甯降於也先。盡以中國虛實告之初。師旣敗。上乃下馬盤膝面南坐。惟喜甯隨侍。有一胡索衣甲不與。欲加害。其兄來曰。此非凡人舉動。自別。擁出雷家站見也先之弟賽刊王。上問曰。子其也先乎。其伯顏帖木兒乎。賽刊王乎。大同王乎。聞其語大驚。馳見也先曰。部下獲一人甚異。得非大明天子乎。也先乃召使中國二人問是否。三人見大驚曰。是也。也先喜曰。我常告天求大元一統天下。今果有此勝。問衆何以爲計。其中一人名乃公大言曰。天以仇賜我。不如殺之。伯顏帖木兒大怒呼也先爲那顏。顏那者。華言大人也。安用此人在傍。摧其面曰去。因力言兩軍交戰。人馬必中刀箭。或踐傷壓死。今大明皇帝獨不踐壓中刀箭。而問那顏。問我等無驚恐怨怒。我等久受大明皇帝厚恩賞。雖天有怒。推而棄之地下。而未嘗死之。我等何反天。那顏若遣使告中國。迎返天子。那顏不有萬世好男子名乎。衆皆曰。者胡語云者。然辭也。於是也先以上送伯顏帖木兒營。令護之時。惟校尉袁彬侍命。彬遣前使臣梁貴持手書示懷來守臣。言被留狀。且索金帛。城閉不可入。縋之上。守臣遣人送至京。以是夜三更從西長安門入報。十七日。百官集闕下。頗聞敗報。私告語驚懼。出朝見敗卒。裹創纍纍。至訊之。皆不知上所在。是日。皇太后遣使賫重寶文綺。載以八騎。皇后錢氏盡括宮中物佐之。詣也先營請還車駕。不報。

谷應泰曰。古者天子有道。守在四裔。及其季也。保境固圉。毋生戎心。是故馬邑之誘。加罪王恢。郅支之誅。斬封延壽。蓋以勤兵遠略。輕開邊釁。非細故也。況乃撐犂之帳。甫逼關門。而黃屋之尊。自爲鎖鑰。晉明帝深窺姑孰。趙武靈突入咸陽。誰實謀國。而乃身試不測之淵。輕入虎狼之穴哉。若夫英宗踐祚。王振擅權。也先桀黠。狡焉啓疆。其時如羅亨信之議備土城。石亨之撥軍屯種。則先事之防也。王直之伏闕懇留。鄜楚之堅請回鑾。王佐之草閒跪伏。則臨事之救也。而王振威福自擅。從來日久。銳意親征。有進無退。豈真楚國聯師。滅此朝食。驃姚報漢。無以家爲者乎。乃從來嘯笑竊弄者。必須假禦侮以固主恩。而勢燄炙手者。易於倖邊功。以邀富貴。此振之所以據鞍顧盼。走死地如驚耳。至於千金之子。坐不垂堂。十室之邑。可以免難。而英宗是時勸駕之言。易入。斷鞅之議不行者。毋亦文皇自征瓦剌。狃於易與。而宣宗自將待邊。又所親見者耶。以故追戎濟上。專目魯公。北伐令支。羣推小白。然而天時人事。則有異焉。方其天變見於上。地變見於下。南宮荆棘。北殿塵灰。比於梅福之金鐵皆飛。宗周之三川告亡。此何景也。至龍臺而一軍皆亂。出居庸而連宵風雨。薄大同而殭屍滿路。比於苻堅之犬嗥宮門。管子之鞞鼓皆濁。此何兆也。逮夫井源敗衄。踵至朱冕。全軍覆沒。而振始還屯。左次定議。班師嗚呼。晚矣。蕩陰之血。酷於染衣。平陽之辱。幾於執蓋。徒使師武臣封尸俱死。諸大夫芟舍無從。楚三戶之衆。見懷王以何期。銳司徒之妻。嘆吾君之不免。幸而共和行政。叔武入守。適來那顏之怒。不用乃公之謀。則貨匪居秦。璧還入趙矣。然而皇太后遣賈重寶。錢皇后盡括宮中幣。與地同盡。人與幣俱往。徽欽之禍。復見於茲。雪窖冰天。魂終漠北矣。然予嘗論之。寇準饒學術。可以戰而真宗受盟。王振少方略。不可以戰而英宗驟舉。是則澶淵之會。以重發而喪

功。土木之變。又以輕爲而至敗耳。彼王振倡謀。喜甯反噬。雖一死沙場。一膏斧鑕。而罪浮罄竹。報不蔽辜。宜乎靖康誅童貫而賈生之書。必欲縛中行說而笞其背也。

卷三十三

景帝登極守禦

英宗正統十四年秋八月。上北狩。太后召百官入集闕下。諭曰。皇帝率六軍親征。已命郕王臨百官。然庶務久曠。今特敕郕王總其事。羣臣其悉啓王聽令。辛未。太后詔立皇長子見深爲皇太子。時年二歲。命郕王輔之。詔天下曰。邇者寇賊肆虐。毒害生靈。皇帝懼憂宗社。不遑甯處。躬率六師問罪。師徒不戒。被留王庭。神器不可無主。茲於皇庶子三人選賢與長。立見深爲皇太子。正位東宮。仍命郕王爲輔。代總國政。撫安萬姓。布告天下。咸使聞知。癸酉。郕王臨午門。言官大臣次第宣讀。彈劾王振啓章。言振傾危宗社。請滅族以安人心。若不奉詔。羣臣死不敢退。因哭聲徹中外。王起入內。使將闔門。衆隨擁入。有令旨籍沒振。遣指揮馬順往。衆曰。順振黨也。宜遣都御史陳鎰。時太監金英傳旨令百官退。衆欲粹毆英。英脫身入馬順從旁叱百官去。給事中王竑憤起。粹順首曰。馬順往時助振惡。今日至此。尙不知懼。衆爭毆之。或就脫順鞵。捶擊躑躅。立斃順。衆又索振黨內使毛王二人。英粹令出。亦擊殺之。曳三屍陳東安門。軍士猶爭擊不已。逾時。執振姪錦衣衛指揮王山。反接跪於廷。衆唾罵之。於是衆競喧譁。班行雜亂。無復朝儀。百官旣毆殺順。益恟懼不自安。王亦屢起欲退還宮。兵部侍郎于謙直前攬王衣曰。殿下止。振罪首。不籍無以泄衆

憤且羣臣心爲社稷耳。無他。王從之。降令旨。獎諭百官歸蒞事。馬順罪應死。勿論。衆拜謝出。是日。事起倉卒。賴謙鎮定。謙排衆翼王入。袍袖爲裂。旣出。吏部尙書王直者。篤老臣。執謙手而歎曰。朝廷正藉公耳。今日雖百王直。何能爲。丙子。移王座入奉天門左受朝。陳謐奉令旨籍振。并其黨彭德清等家。振第宅數處。壯麗擬宸居。器服珍玩。尙方不及。玉盤徑尺者十面。珊瑚高者七八尺。金銀十餘庫。馬萬餘匹。皆沒官。樹山於市。族屬無少長。皆斬。振暨山弟林等皆從。駕死於兵。太后命以于謙爲兵部尙書。二十三日也。先擁上至大同城下。索金幣約賂。至卽歸上。都督郭登閉門不納。上傳旨曰。朕與登有媿。何外朕若此。登遣人傳奏曰。臣奉命守城。不敢擅啓閉。隨侍校尉袁彬以頭觸門大呼。於是廣甯伯劉安給事中孫祥。知府霍宣同出見。獻蟒龍袍。上以賜伯顏帖木兒及也先弟大通漢英王。上曰。秋稼未收。軍士久飢。可令刈以入城。又曰。也先聲言歸我。情僞難測。且嚴爲備。從騎叩城下。索犒軍資。并內官郭敬等金銀共萬餘兩。來迎駕。旣獻。復不應。初也先來索賂。郭登曰。此給我耳。莫若以計伐其謀。劫營奪駕入城。此爲上策。乃謀以壯士七十餘人餉之食。令奮前執其弓刀。因擁上還。召壯士與之盟。激以忠義。約事成高爵厚祿。士皆奮躍用命。已書券給之。會有沮者。旣淹久。寇覺。驚擾而去。時登練兵振武。誓以死守大同。將士咸感奮。屢出奇挫敵。故以孤城得全。也先擁上道宣府。總兵楊洪閉城門不出。事聞。逮洪繫詔獄。上出塞。過貓兒莊。九十海子。歷蘇武廟。李陵碑。二十八日至黑松林。也先營在焉。上始入也先營。也先拜稽首侍坐。設宴。令妻妾出上壽。歌舞爲樂。仍奉上居。伯顏帖木兒營去也先營十餘里。伯顏帖木兒與其妻見上。亦如也先禮也。先屢欲謀害。會夜大雷雨。震死也先所乘馬。謀乃沮。且加禮焉。袁彬侍左右。頗知書。性警敏。又

有哈銘者。先隨使臣吳良羈留在此。至是亦與彬同侍。又有衛沙狐狸者。亦隨上至漠北。供薪水。勞苦備至。二十九日。太后遣太監金英傳旨。皇太子幼沖。邸王宜早正大位。以安國家。時議者以時方多故人。心危疑。思得長君。以弭禍亂。於是文武羣臣交章勸進。王再辭讓。衆請遵太后命。允之。遂擇日行禮。九月戊寅朔。上在迤北。也先遣使來言。欲送上還京師。使還以金百兩。銀二百兩。綵幣二百匹。賜也先。癸未。邸王卽皇帝位。遙尊上爲太上皇。詔赦天下。改明年爲景泰元年。也先復遣使致書。辭悖慢。兵部尙書于謙見帝泣言曰。寇賊不道。勢將長驅深入。不可不預爲計。邇者各營精銳。盡遣隨征。軍資器械。十不存一。宜急遣官分設募召。官舍餘丁。義勇起集。附近民夫。更替沿河漕運。官軍令其悉隸神機等營。操練聽用。仍令工部齊集物料。內外局廠晝夜併工。成造攻戰器具。京師九門宜用都督孫鏜。衛穎等給領兵士出城守護。列營操練。以振軍威。選給事中御史如王竑等分出巡視。勿致疎虞。徙郭外居民於城內。隨地安插。毋爲寇掠。通州壩上倉糧。不可捐棄。以資寇。令在官者悉詣關支準。爲月糧之數。庶幾兩得。帝嘉納之。以兵部郎中羅通給事中孫祥竝爲副都御史。分守居庸紫荆等關。以薛瑄爲大理寺丞。分守北門。命侍講徐理。楊鼎。檢討王詢等行監察御史事。分鎮河南。山東等處要地。撫安軍民。令各處招募民壯。就令本地官司率領操練。遇警調用。起楊洪。石亨於詔獄。命洪仍守宣府。亨總京師兵馬。享有威望。方面鉅軀。鬚垂至膝。先協守萬全。坐不救乘輿。械繫詔獄。至是以于謙言赦出之。使總京營兵馬贖罪。十月也先以送上皇還京爲名。與可汗脫脫不花寇紫荆關。京師戒嚴。先是太監喜甯故韃靼也。土木之敗降於也先。盡以中國虛實告之。爲彼嚮道。奉上皇入寇。七日至大同城下。守臣郭登曰。賴天地祖宗之靈。國

有君矣。也。先知有備。不攻去。九日。至廣昌。破紫荊關。殺指揮韓清等。都御史孫祥走死。朝野洶洶。人無固志。赦交趾。敗績論死。成山侯王通爲都督。陞鴻臚寺卿。楊善爲副都御史。協守京城。太監興安問王通計。將安出通。以挑築京師外城濠爲對。興安鄙之。侍講徐理方有時名。亦銳意功業。太監金英召徐理問計。理曰。驗之星象。歷數。天命已去。請幸南京。英叱之。令人扶出。明日。于謙上疏。抗言京師天下根本。宗廟社稷。陵寢百官萬姓。帑藏倉儲咸在。若一動。則大勢盡去。宋南渡之事。可鑒也。理妄言當斬。太監金英宣言於衆曰。死則君臣同死。有以遷都爲言者。上命必誅之。乃出榜告諭。固守之議始決。謙聞寇迫關。思各處芻粟數萬計。恐爲敵資。急遣使焚之。然後奏聞。或請姑待報。謙曰。寇在目前。若少緩。彼將據之。適以齎盜糧耳。獨不見宋牛蛇崗事乎。衆皆是之。己卯。也。先長驅至京城西北關外。命石亨等軍於城北。兵部尙書于謙督其軍。都督孫鏗軍於城西。刑部侍郎江淵參其軍。皆背城而陣。以交趾舊將王通爲都督。與御史楊善守城。時衆論戰守不一。主將石亨欲盡閉九門。堅壁以避賊鋒。謙曰。不可。賊張甚矣。而我又先弱。是愈張也。乃先率士卒躬擐甲胄。出營德勝門。以示必死。泣以忠義諭三軍。人人感奮。勇氣百倍。尙寶司丞夏瑄陳四策。一謂寇多騎。長於野戰。短於攻城。且堅壁勿戰。使之氣沮。然後出奇設伏。諸道奮擊。一謂寇深入。宜令死士夜襲其營。設伏內地。以待追者。一謂寇旣舉國入犯。邊無所禦。宜分邊兵內外夾攻。彼將自潰。一謂我軍依城爲營。退有所歸。宜以三隊爲法。前隊戰退。令中隊悉斬以徇。不斬者同罪。使士知畏法。詔趣行之。喜甯嗾也。先遣使來議和。索大臣出迎。駕衆莫敢出。乃以通政參議王復爲禮部侍郎。中書舍人趙榮爲鴻臚寺卿。出朝上皇於土城廟。也。先伯顏帖木兒擐甲持弓矢侍上皇。復等見上皇。進書。

敕上皇視漢字書也。先視番字敕也。先曰爾皆小官。急令王直、胡濙、于謙、石亨來。上皇諭復。榮曰：彼無善意。汝等宜急去。二人辭歸。寇益四出剽掠。焚三陵殿寢祭器。逼宣武門南。踰蘆溝橋。散掠下邑。攻城益急。石亨折弓厲聲曰：宰臣不出。計莫能支矣。大學士陳循等疏請敕宣府、遼東總兵楊洪、曹義各選勁騎與官軍夾擊。又請旨募斬也先者賞萬金。封國公。復僞作喜甯與太監興安書云：約誘也先入寇。欲乘其孤軍取之。書爲也先邏卒所獲也。先頗疑喜甯。旣而宣府、遼東兵至。軍大振。時諸軍二十二萬列城下。寇見大軍盛而嚴。不敢輕犯。以數騎來嘗。謙設伏空屋。遣騎誘之。遂以萬騎來薄。伏發。敗之。石亨出安定門。與其從子彪持巨斧突入中堅。所向披靡。敵卻而西。亨追戰城西。復卻而南。彪率精兵千人誘寇至彰義門。寇見彪兵少。逼之。亨率衆乘之。寇敗走。神機營都督范廣以飛槍火箭殺傷甚衆。都督孫鏜禦寇西直門。失利。諸將不相援。鏜急叩門求入。給事中程信監軍西城。言鏜小失利。卽開門納鏜。賊益張。人心益危。乃閉城趣鏜戰。寇逼城。鏜兵走死地。亦附城戰。信與都督王通、都御史楊善城上鼓譟。槍礮佐鏜。毛福壽、高禮往援。禮中流矢。石亨兵亦至。乃引退。於是也先知我有備。氣稍沮。于謙使諜。諜知上皇移駕遠。命石亨等夜舉火。大礮擊其營。死者萬人也。先以上皇北遁。脫脫不花聞之。遂不敢入關。亦遁也。先出居庸關。伯顏帖木兒奉上皇出紫荆關。諸將分兵躡其後。石亨與從子彪復破寇於清風店。孫鏜、楊洪、范廣逐寇至固安。又捷奪回人口萬餘。時寇騎散掠各郡。不過百餘騎。驅人畜以自衛。望之若萬衆。然猶殺官軍數百人。洪子俊幾爲所獲。上皇出紫荆關。連日雨雪。乘馬踏雪而行。上下艱難。遇險則袁彬執控。哈銘亦隨之。旣入寇營。也先來見。宰馬拔刀割肉。燎以進。云：勿憂。終當送還。食訖辭去。脫脫不花遣使來獻馬議和。

朝廷卻之。胡濙王直曰：「脫脫不花也。先君臣素不睦，宜受其獻以閒之。從其言，使人入見，賜衣服酒饌金帛。」協守大同都督郭登議：「率所部并糾集義勇從雁門入援，先以蠟書馳奏。」大略謂：「戎馬南驅，三關失險，畱連內地爲患非輕。欲悉起各處官軍民壯入護內廷，京兵擊於內，臣兵擊於外，使賊有腹背受敵之虞。首尾不救之患，且曰：『忠誠切已，敢忘報國之心。成敗在天，不負爲臣之節。』以賊退，優詔褒答之。時我師屢衄，邊陲無完地。大同兵士戰沒之餘，城門晝閉，人心土崩。有愛登者泣謂之曰：『事已至此，柰何？』登曰：『天若祚國，必無他憂。若敵勢莫遏，吾與此城誓相存亡。當不使諸君獨死也。』大同孤危，登氣益壯，弔死問傷，親爲痛恤。晝夜籌慮，修城繕兵，以圖後舉。尋京師圍解，登上疏言寇騎雖回，離邊不遠，傳報有云：『黃河已凍，且向延綏，青草復生，再侵京闕。』事雖未信，備必先修，乞推誠待下，側席求賢，明理克欲，以成聖學。親賢遠佞，以收人望。既又傳也，先將復犯京師，登以京兵新選，不可輕戰。又疏曰：『今日之計，可以養銳，不可浪戰。可以用智，不可鬪勇。兵法知彼知己，可守則守。其涑水、易州、真定、保定一帶，皆堅壁清野。京兵分據犄角，安營以逸待勞，以主待客，勿求僥倖，務在萬全。此謂不戰而屈人兵，善之善者也。』命都指揮董寬率兵督河間、瀋陽等衛緝捕盜賊。時降人安置畿內者乘時並起爲盜。十一月，以寇退，京城解嚴，降詔撫安天下。楊洪等班師還京，論功封楊洪昌平侯，石亨武清侯。加于謙少保，總督軍務。謙固辭不許，有誦謙功者，輒謝曰：「四郊多壘，卿大夫之恥，今但不城下盟，何功也。」學士陳循疏言：「守居庸副都御史羅通曉暢軍事，宜召還守宣府。總兵楊洪及子俊皆善戰，宜畱之京師。」于謙曰：「宣府京師之藩籬，居庸京師之門戶，邊備旣虛，萬一也。先乘虛據宣府爲巢窟，京師能安枕乎？」兵科給事中葉盛亦上言：「今日之事，邊關爲急。」

往者馬營。獨石不棄。則六師何以陷土木。紫荆。白羊不破。則寇騎何以薄都城。卽此而觀。邊關不固。則京城雖守。不過僅保九門。其如寢陵何。其如郊社壇壝何。其如四郊生靈荼毒何。宜急令固守爲便。先是。土木旣敗。邊城多陷。宣府孤危。旣而復召宣府總兵入衛京師。人心益懼。或欲遂棄宣府。紛然就道。都御史羅亨信不可。仗劍坐當門拒之。下令曰。敢有出城者必斬。衆始定。城中老稚歡呼曰。吾屬生矣。因設策捍禦。督將士誓死守。寇知有備。不敢攻。至是。上從于謙。葉盛言。乃以左都督朱謙佩印鎮宣府。紀廣。楊俊副之。僉部王竑鎮居庸。上皇北至小黃河。蘇武廟。伯顏帖木兒妻阿撻刺阿哈刺令侍女設帳迎駕。宰羊遞杯進膳。尋值聖節。也先上壽。進蟒衣貂裘筵宴。哈銘。袁彬常宿御寢傍。天寒甚。每夜。上皇令彬以兩脅溫足。一日晨起。謂銘曰。汝知乎。汝夜手壓我胸。我俟汝醒。乃下手。因言。光武與子陵共臥事。銘頓首。上皇夜出帳房。仰觀天象。指示二人曰。天意有在。我終當歸也。上皇使哈銘致意伯顏妻。令勸伯顏送還朝。妻曰。我婦人。何能爲。然官人洗濯。我侍巾帨。亦當進一言。伯顏嘗因獵得一雉。并酒一卮來獻。銘時時設喻。慰上皇勿憂。或成疾。時也先聲言欲送上皇還。衆遂多主和。于謙獨排衆議曰。社稷爲重。君爲輕。遣人申戒各邊將。毋墮賊計。命尙書石璞鎮守宣府。都御史沈固鎮守大同。都督王通守天壽山。僉都御史王竑。城昌平。都御史鄒來學提督京都軍務。平江伯陳豫守臨清。副都御史羅通守山西。

景帝景泰元年春正月。上皇書至。索大臣來迎。命公卿集議。廷臣因奏請遣官使北賀節。進冬衣。上謂必能識太上皇帝者。始可行。羣臣懼謝罪。事遂寢。大同總兵郭登敗寇於栲栳山。寇入大同境。登率兵躡之行七十里。至水頭。日暮休兵。夜二鼓。有報云。東西沙窩賊營十二。皆自朔州掠回。登召諸將問計。或言

賊衆我寡莫若全軍而還。登曰：我軍去城百里，一思退避，人馬疲倦，賊以鐵騎來追，卽欲自全得乎？按劍起曰：敢言退者斬。徑薄賊營，天漸明，賊以數百騎迎戰，登奮勇先登，諸軍繼進，呼聲震山谷，登射中二人，手刃一人，遂大破其衆，追奔四十餘里，至栲栳山，斬首二百餘，奪還人馬器械萬計，進封定襄伯，食祿千一百石，與世券，是役也。登以八百騎破寇數千，爲一時戰功第一，登爲將智勇善撫士卒，紀律嚴明，料敵制勝，動合機宜。在大同，與賊相拒一年，大小數十戰，未曾挫衄，常恨馬少，步卒追賊不及，乃以己意設爲夾地龍，飛天網，鑿爲深塹，覆以土木，人馬通行如履實地，賊入圍中，令人發機，自相擊掃，頃刻十餘里皆陷。又用礮石擊賊，一發五百餘步人馬死者數十，賊傳以爲神云。時也先分調各部擾邊，朱謙敗之於宣府，杜忠敗之於偏頭關，王翱敗之於遼東，馬昂敗之於甘州，修城堡，簡精銳，各邊皆有備。石亨佩大將軍印，巡邊，石彪、楊俊亦閒出，中國勢遂振。閏正月，叛人小田兒伏誅，小田兒爲也先鄉導，雜使中來，闕虛實，于謙授計侍郎王禕，就大同道誅之。二月，叛臣喜甯伏誅，甯懷二心，教也先擾邊，且不欲送上皇還，上皇深惡之，甯又忌袁彬，誘彬出營將殺之，上皇急救之，乃免。彬與上皇謀，遣甯傳命入京，令軍士高磐與俱，密書繫磐，髀閒令至宣府，與總兵等官計擒之。旣至宣府，參將楊俊出與甯飲，城下磐抱甯大呼，俊縱兵遂縛甯送京，誅之也。先聞甯誅，與賽刊王等分道入犯。三月，也先賽刊王寇大同，陽和、大同王寇偏頭關，蒼兒不花王寇亂柴溝，鐵哥不花王寇大同八里店，鐵哥平章寇天城，脫脫不花王寇野狐嶺，并萬全。夏四月甲戌，戶部尙書金濂等議寇騎犯邊，大軍失利，遺有馬營、獨石、龍門、鷓鴣等處芻糧，宜令督儲侍郎劉璉提督軍務，副都御史羅通及宣府總兵朱謙遊擊楊能會計徙運宣府從之。都督楊俊

請大舉出塞。大同宣府列營堅守爲正兵。獨石偏頭乘閒設伏爲奇兵。悉發京營與諸鎮兵出塞。逐北而擊其王庭。可以得志。于謙曰。報仇雪恥。臣等職也。顧與兵舉事。係社稷安危。卽如俊所言。萬一我軍出塞。賊以偏師綴我。而別遣部落閒道乘虛入寇。是自撤藩籬。非萬全計。臣愚未見其可。上從謙議。大同參將許貴請遣使贖幣以款寇兵。而徐爲討伐計。于謙曰。前者固非不遣。使都指揮季鐸指揮岳謙遣而寇騎已至關口。通政王復少卿趙榮遣而不獲。徵太上一信。其狡焉侮我而齧我。何似而可言。况也先不共戴天仇也。理固不可和。萬一和而彼遂肆無厭之求。從之則坐弊不從則生變。勢亦不可和。貴介胄之臣而委靡怯法。當誅。是時上任謙方專。疏旣入。於是邊將人人言戰守也。先不得挾重相恫喝。抱空名不義之質。始謀歸太上矣。諜報也。先逼總兵朱謙於關子口。明日復報追石亨於雁門關。烽火連屬。衆皆恐。請大發兵援之。于謙策也。先大隊尙遠塞。必張疑兵以脅我。乃上方略授石亨。使皆堅壁。而令各營秣馬厲士。若將大舉者。仍遣延綏總兵帥騎渡河於保德州。設伏截殺。從之。已而賊果不至。于謙以畿輔諸州郡兵力單甚。乃皆宿兵。奏遣都指揮陳旺石端王信王竑等分屯涿鹿。眞定保定易州諸處。而以右都督楊俊帥焉。久之皆屹然重鎮。五月乙巳。巡撫山西都御史朱鑑奏也。光分道入寇。請令關隘守將畫地救援。寇犯河曲保德岢嵐。宜令偏頭關策應犯甯化靜樂忻州定襄太原清源交城文水。宜令山西策應犯五臺繁峙崞縣。宜令雁門關策應其石州甯鄉。宜令汾州守備分兵協守。從之。武清侯石亨奏寇騎六萬圍代州。官軍出戰有斬獲。又分營雁門關一路。恐侵京師。下廷臣議。黃花鎮鞍口外衛西北邊境內護陵寢。京師宜益兵守備。從之。仍令兵部稽在京軍馬數。以聞。寇騎犯宣府。總兵都督朱謙等率兵

力戰卻之。官軍陣亡者百四十人。都督江福等兵應援不利。殺傷百餘人。兵部言通事馬雲馬青先奉使迤北許也。先細樂妓女。又許與中國結婚。皆出自指揮吳良。致開邊釁。請寘諸法。詔下錦衣衛鞠之。立京團營操法。初太宗以北伐故。宿重兵燕中。會承平久。不能無老弱。公侯中貴人往往役占土木之難。精銳略盡。雖有五軍神機三千諸營。然不相統一。每遇調遣。號令紛更。兵將不相識。于謙上言。兵冗不練。遇敵輒敗。額四十餘萬。非盡可用者。徒費大家米。於是卽諸營選馬步驍悍者十五萬。分爲十營。每營各以都督領之。五千人爲一小營。營以都指揮領之。團操以備警急。是爲團營。而以謙總督。列侯石亨楊洪柳溥爲總兵。太監曹吉祥劉永誠等監之。餘步騎仍歸三大營。曰老營。自是兵將相識。每出征卽令原管都督領之。故號令歸一。洪亨皆老將宿猾。而亨尤貪縱。謙威令嚴密。目視指屈。口奏悉合機宜。亨等雖爲大帥。進止賞罰。一由謙。相顧頰首而已。戮左都督楊俊。俊楊洪子也。恃勇桀驁。不可馴。先備獨石馬營等土木之變。棄城逃歸。馬營龍門等八城皆不守。旣而命爲參將。帥兵巡哨懷來等處。復輒調永甯守備官軍於懷來。將永甯城西門砌塞。于謙劾其方命專權。擅作威福。詔宥不問。俊又以私怨都指揮陶忠杖撻死。父洪懼禍。奏取俊還京。隨營操練。旣至。謙併劾其獨石棄城。喪師辱國。及懷來私仇捶死邊將之罪。謂非誅俊無以懲戒將來。兵科給事中葉盛等亦劾之。於是逮繫法司議罪。斬於市。阿剌遣使貢馬。請和。邊臣留之。懷來以聞。是時韃靼政事也。先專之。兵最多。脫脫不花雖爲可汗。兵少。知院阿剌兵又少。君臣鼎立。外親內忌。其合兵南侵。利多歸也。先而弊則均受。及也先欲和。恥屈意。陰使阿剌等來言。於是禮部會議。請遣太常少卿許彬錦衣都指揮同知馬政譯來使情。僞彬等言也。先果欲議和。罷兵。且奉還上

皇奏至。帝問尙書學士陳循曰：「先可和耶？」循曰：「遣而備之。」上曰：「然。」乃降璽書厚賜阿剌。數也先挾詐。義不可從。卽阿剌必欲和好。待瓦剌諸部落北歸。議和未晚。不然。朕不惜戰也。六月。吏部尙書王直等言也先遣使請上皇還京。蓋上下神祇陰誘其衷。使之悔悟。伏望皇上許其自新。遣使臣前去審察誠僞。如果至誠。特賜俯納。奉迎上皇以歸。不復事天臨民。陛下但當盡崇奉之禮。庶天倫厚而天眷益隆。上曰：「卿言甚當。然此大位非我所欲。蓋天地祖宗宗室文武羣臣之所爲也。自大兄蒙塵。朕累遣內外官員費金帛迎請也先。挾詐不肯聽。若又使人往。恐假以送駕爲名。羈留我使。率衆來犯京畿。愈加蒼生之患。卿等更加詳之。勿遺後患。」上皇駕至大同。先是也先入寇。聲言選戰馬奉。上皇南歸。是日至大同。定襄伯郭登設計於城月門裏。具朝服以候。潛令人伏城上。俟上皇入。卽下城闌板。旣及門。寇覺之。遂擁上皇退去。武清侯石亨言雁門關一帶山口。雖已築塞。賊猶漫山徑過。須斷其半山可行之處。京城四面宜築墩臺。以便瞭望。署都督僉事劉鑑言京師與懷來止隔一山。請自懷來築烟墩。直至京師土城。遇事舉火。以報從之。秋七月也先屢以和議不成。復俾其知樞密院阿剌爲書。遣參政完者脫歡等五人至京師。請和禮部議。尙書胡濙等奏奉迎上皇。帝不允。次日帝御文華殿。召文武羣臣諭曰：「朝廷因通和壞事。欲與寇絕。而卿等屢以爲言何也？」吏部尙書王直對曰：「上皇蒙塵。理宜迎復。乞必遣使。勿使有他日悔。帝不懌曰：「我非貪此位。而卿等強樹焉。今復作紛紜。何衆不知所對？」于謙從容曰：「大位已定。孰敢他議。答使者冀以舒邊患。得爲備耳。帝意始釋。曰：「從汝從汝。言已卽退。羣臣出文華門。太監興安傳呼曰：「孰堪使者？」有天祥富弼乎。衆未答。王直面赤。厲聲曰：「是何言？」臣等惟皇上使。誰敢勿行者。安語塞入復。時李實任禮科

都給事中。帝命與安傳旨。欲遣之。對曰。實不才。然朝廷多事。安敢辭。與安入復命。遂以李實爲禮部右侍郎。充正使。羅綺爲大理寺少卿。充副使。馬顯授指揮使。爲通事。上御左順門。召實等面諭曰。爾等見脫脫不花也。先立言有體。上遺書脫脫不花。可汗曰。我國家與可汗自祖宗來和好往來。意甚厚。往年奸臣減使臣賞。遂失大義。遮留朕兄。今各邊奏報。可汗尙留塞上。殺掠人民。朕欲命將出師。念彼此人民。上天赤子。可汗殺朕人。朕亦殺可汗人。與自殺何異。朕不敢恃中國之大。人民之衆。輕於戰鬪。恐逆天也。近得阿剌使奏言。已將各路軍馬約束回營。是有畏天之意。深合朕心。特遣使齎書幣達可汗。其益體朕意。副天心。復降璽書諭也。先及阿剌遺可汗也。先阿剌白金文綺。時閣臣及府部諸臣承上意。止言息兵講和。不及迎復上皇意。實等遂偕完者脫歡行。以十七日至也。先營地名失八禿兒。既見也。先讀璽書畢。乃引見上皇。上皇居伯顏帖木兒營。所居氈毳帳服。食飲皆羶酪。牛車一乘。爲移營之具。左右惟校尉袁彬暨哈銘侍。實等見上皇泣。上皇亦泣。上皇曰。朕非爲遊畋而出。所以陷此者。王振也。因問太后。皇上。皇后俱無恙。又問二三大臣。上皇曰。曾將有衣服否。實等對曰。往使至。皆不得見天顏。故此行。但擬進問。未將有也。實等乃私以所有糗餌常服獻。上皇曰。此亦細故。但與我圖大事也。先欲歸我。卿歸報朝廷善圖之。儻得歸。願爲黔首。守祖宗陵墓足矣。言已俱泣下。實等因問上居此亦思舊所享錦衣玉食否。又問何以寵王振至此。致亡國。上皇曰。朕不能燭姦。然振未敗時。羣臣無肯言者。今日皆歸罪於我。日暮實等歸宿也。先營酌酒相待也。先伯顏貂裘胡帽。其妻珠緋覆面垂肩。盃酪孟肉。更互彈琵琶。吹笳兒。按拍歌勸酒也。先曰。南朝我之世仇。今天使皇帝入我國。我不敢慢。南朝若獲我。肯留至今日乎。又言皇上在此。吾輩無所

用之。每遣使南朝令來迎。竟不至。何也。實等反覆讐曉。欲奉迎上皇意也。先曰。南朝遣汝通問。非奉迎也。若歸。亟遣大臣來。實等遂辭歸。上皇出三書授實。其一上皇太后。其一達於上。其一諭羣臣。伯顏帖木兒約實速來成和好。且指也先幼子曰。此與朝廷議姻者。實不敢對。實未至京。會脫脫不花亦遣使皮兒馬黑麻請和。右都御史楊善慨然請行人。皆危善。善曰。上皇在沙漠。此爲臣者效命之秋也。中書舍人趙榮亦請往。乃遣善。榮及指揮王息千戶湯胤勣同皮兒馬黑麻往。道遇實。實告以故。善曰。得之矣。卽敕書所無。可權以集事也。實旣還朝。具述也先情。及上皇起居狀。諸文武大臣合疏言。李實出塞。道中行。北騎聞欲議和。皆舉手加額。及見也先。殊喜。言迎使夕來。大駕朝發。實又具道也先悔過。宜迎復。上曰。也先詐。楊善已去。第以迎復意書。敕付也先。使還。大臣言也先非詐也。臣等詢李實詳矣。彼使來和。當遣使答。今請迎復。乃不與偕。是輕迎駕。重講和也。不迎駕歸。何以和爲。帝令再議。李實言也先約臣迎駕。毋出八月五日。臣言須得旨。不敢擅爲期也。先言期必不可失。遂令渠長偕羅綺往大同。調還擾邊人馬。臣還過懷來。宣府見軍民始敢出郊芻牧。誠非空言。伏望陛下俯從羣請。脫有虞詐。亦可塞之。若過所期。更欲使臣亦不敢往。帝竟付迎復於敕書而已。不遣使。曰。待楊善歸。監察御史畢鑾復言。羣臣之請切矣。陛下必待善歸。夫中國所恃者信義也。不迎不義。失詞非信。就令彼詐。我備在也。翰林邢讓亦以爲言。帝曰。上皇朕兄。豈有不迎。彼情叵測。正欲探之情。誠而迎。又何暮焉。楊善旣出境。也先使所善田民者爲館伴來迎。且有所探。飲帳中。謂善曰。我亦中國人。被留於此。前者土木之役。六師抑何弱也。善曰。當是時。六師之勁悉南征。而中貴人振欲邀太上幸故里。止扈從。一不爲備。故潰。雖然。彼幸而勝。未見爲福。今者南征之士悉歸。

可二十萬。又募中外材官技擊得三十萬。悉教以神槍火礮藥弩。射命中百步之外。洞人馬。復穿七札。又用言者計。沿邊要害皆隱金椎三尺。所值躡立穿。刺客林立。夜度營幕若猿猱。而皆已矣。置之無用矣。問何以言無用。曰。和議成。方且歡飲。若兄弟。而又何用也。其人悉以語也。先二十九日至也。先營。值其出獵。八月初二日丁卯。與也先相見也。先問減馬價。故善曰。往時外使不過三十人。今多至三千餘人。卽稚子亡弗賚者。金帛器服駱驛載道。而豈得言薄也。先曰。然則柰何留我使。予我帛時。翦裂幅不足者。善曰。帛有翦裂不足者。通事爲之也。事露而誅矣。卽所進馬有劣弱。而貂皮敝。豈太師意耶。至使臣所從人爲奸盜他所。或遇害。中國留之何用也。先又問市釜事。善言此小民市易。朝廷豈知。善因歷述累朝恩遇之厚。不可忘。且言天道好生。今縱兵殺掠。上干天怒。反覆辨論。數千百言也。先喜也。先問上皇還。更臨御否。善言天位已定。不得再易也。先問古堯舜事如何。善言堯讓位於舜。今日兄讓位於弟也。先悅服。平章昂克問善欲迎復。來何操。善言若操賄來迎。後人以爾貪賄歸上皇。今無所操而歸。書之史冊。後世皆稱述也。先然其言曰。史中好爲書也。伯顏帖木兒請留使臣。遣使欲南朝。更請上皇臨御也。先曰。曩令遣大臣來迎。大臣至矣。不可無信。引善見上皇。明日也。先設宴餞上皇於其營。善侍也。先與妻妾以次起爲壽。酒中令善坐上皇亦曰。從太師言坐。善曰。雖草野不敢失君臣禮也。先顧羨曰。中國有禮能酒。送上皇出。明日宴使臣。又明日伯顏帖木兒設宴餞上皇。又明日亦宴使臣。又明日癸酉。上皇駕行也。先與渠帥送車駕可半日許。下馬解弓箭戰裾以進。諸渠帥羅拜而去。伯顏帖木兒獨送上皇至野狐嶺。進酒帳房。旣畢。屏人語哈銘曰。我也先順天意。敬事皇帝一年矣。皇帝此來爲天下也。歸時還當作皇帝。卽我主人。有緩

急。我可得告愬。衆皆道傍送駕。進牛羊。善口呼皇帝行矣。伯顏帖木兒再送駕出野狐嶺口。上皇攬轡慰藉。而與之別。伯顏帖木兒大哭歸。仍命渠帥率五百騎送至京師。旣別去。行數里。復有追騎至。上皇失色。旣至。乃其平章昂克出獵。得一獐。馳使來獻。受之。乃去。駕入關。丁丑。上皇至宣府南城。上遣太常少卿許彬奉迎。工部尙書高穀。給事中劉福等言奉迎上皇。禮不宜薄。禮部連日會議未定。壬午。上皇至宣府。癸未。千戶龔遂榮投書於高穀。所穀袖入。傳示文武大臣。王直。胡濬謂禮失而求諸野。欲以上聞中止。給事中葉盛。程信。于太上疏言。諸大臣持一帖。羣立午門。傍聚觀。議論藉籍。乞宣問之。書言上皇之出。以宗社故。非遊獵也。都人聞上皇且還。無不喜躍。迎復禮宜厚。上亦當避位懇辭。然後復位。否則貽譏後世。上詰諸大臣。已而知書出穀所。上曰。朕未嘗塞言路。穀大臣胡不告朕。爲匿名書耶。遂榮恐累穀。乃發憤自白。陳循。王文見之。恚甚。請治其罪。下錦衣衛獄。然上不深罪也。尋釋之。己卯。上皇至懷來。將抵居庸。禮部始得旨。羣臣同禮部議。迎復儀注。兵部總戎議防變方略。百官集會議所。都御史王文。忽厲聲曰。孰以爲來耶。黠寇不索金帛。必索土地耳。衆素畏文。相顧莫敢言。給事中葉盛等造禮部問。時胡濬已具儀注送內閣矣。略謂天寶之亂。玄宗幸蜀。肅宗卽位靈武。尊玄宗爲太上皇帝。肅宗收復兩京。迎還上皇。至咸陽。備法駕。望顏樓。上皇在宮南樓。肅宗著紫袍。望樓上拜舞。樓下上皇降樓。撫肅宗而泣。辭黃袍。自爲肅宗著之。肅宗伏地頓首固辭。上皇曰。天下人心皆歸於汝。使朕得保餘齡。汝之孝也。肅宗乃受。今備法駕安定門外。誠爲太簡。帝曰。慮墮狡寇計。故簡其禮。大兄入城。朕知尊親。遂備法駕。候安定門外。庚辰。上皇至唐家嶺。遣使回京。詔諭避位。免羣臣迎。丙戌。百官迎上皇於安定門。上皇自東安門入。上迎拜。上皇答拜。各

述授受意。遜讓良久。乃送上皇至南宮。羣臣就見而退。大赦天下。命保定伯梁瑤征苗寇。以河間等降丁從征。先是永樂閒。塞北部落來降者多。安置河間。東昌等處。生養蕃息。強悍不可制。方也先入寇。乘機騷動。至是大發兵征兩廣。湖貴苗寇。兵部尙書于謙奏遣之。其有名號者厚賞犒。隨軍有功。則官之。已而更遣其妻子往。自是肘腋無他患。

二年秋九月也。先遣使求通好。因邀我使往報。上從言官議。詔絕之。

三年夏四月。命都督同知孫安鎮守獨石。馬營。以兵科都給事中葉盛爲山西右參政。協贊軍務。先是楊洪鎮獨石。馬營等八城。已已失守。殘毀未復。議者欲棄之。于謙曰。棄之。則不但宣府。懷來難守。京師不免動搖。乃薦安。授以方略。仍命盛贊其軍務。盛至。列利害八條。以進。次第行之。率兵度龍門關。且戰且守。八城完復如舊。盛又請帑金五千兩。買牛犢簡戍卒。不任戰者俾事耕稼。歲課餘糧於官。凡軍中買馬。修器。勞功。恤孤。諸費皆取之。盛在獨石五年。軍民賴之。邊境得安。時土木北狩。浙閩三楚。貴竹盜賊。蠭起。前後命將將兵。皆出謙獨運。號令明審。動合機宜。雖宿舊勳臣。少不中程律。卽請旨切責不貸。片紙行萬里。電燿霆擊。靡不惴惴效力。毋敢飾虛辭以抵者。以故天下咸服謙。而歸上能用人。

谷應泰曰。英宗北狩。戰士兵甲死亡略盡。邊關守隘。望風奔潰。搖足之閒。黃河以北。非國家有矣。幸而遷都議格。鐘籥不驚。然而君父叩關。臣子拒敵。彼出有名。我負不義。狐疑旣生。上下瓦解。講使亟行。責問無已。長安必不可守。英宗必不能歸。徒使有貞之輩。操星象而笑其後也。嗟乎。南遷不行。然後國存。和議不行。然後君存。兩議俱息。君國皆存。而少保之禍。不得旋踵矣。當夫北兵四合。守禦單寒。虎穴故君。已置度。

外圍城新主亦危孤注身先矢石義激三軍家置環寺之薪人守州兵之哭傲如石亨怯如孫鏜懦如王通無不斬將搴旗緣城血戰追奔逐北所向披靡此一役也軍聲復振君臣固守陵闕磐石矣然而遣使入朝動請迎駕懸師剽掠輒託回鑾彼直我曲彼壯我老也先者方且挾此奇貨羈制中原以戰不敗以和可成輸幣不還進而割地割地不歸誘之稱臣中原生靈自此無安枕矣而乃兄終弟及父子之情既割社稷爲重君臣之義亦輕至則龍衣糗食敬輸橐籥之忱歸亦別院閒宮不過漢家之老然則挾天子者挾一匹夫耳邀利之心懈而好義之心萌郭登之言決而楊善之說行英皇自此生入玉門矣昔太公置鼎漢祖分羹徽欽被執宋高哀請一則新豐雞犬還老闕庭一則淚灑冰天終於輿櫬蓋相如碎壁而壁存賈胡藏珠而珠去擁空名者視同虛器居必爭者勢難瓦全也夫昭王沈漢穆滿難歸楚懷入秦頃襄不反彼此得失危不閒髮故漢高分羹之語乃孝子之變聲郭登有君之謝實忠臣之苦節英宗不感生還反疑予敵謙死東曹登貶南都忠臣義士所以仰天椎心而泣血也景帝外倚少保內信興安狡寇危城不動聲色當時朝右豈乏汪黃建炎踐祚亦有宗李相提而論景誠英主而乃戀戀神器則又未聞乎大道者也

卷三十四

河決之患

英宗正統十三年秋七月河決滎陽經曹濮衝張秋潰沙灣東堤奪濟汶入海尋東過開封城西南經陳

甌自亳入渦口。又經蒙城至懷遠界入淮。命工部尙書石璞治之。弗就。尋復以侍郎王永和代璞。舊黃河在開封城北四十里。洪武二十四年。河決原武。東經開封城北五里。又南行至項城。經潁州。潁上縣。東至壽州。正陽鎮。全入於淮。而元會通河遂淤。永樂九年。尙書宋禮濬會通河。開新河。自汶上縣袁家口。左徙二十里。至壽張之沙灣。接舊河。九閱月而績成。侍郎金純從汴城金龍口。下達場塢口。經二洪。南入淮。漕事定。爲罷海運。至是。又決滎陽。過開封城西南。而城北之新河又淤。自是汴城在河北矣。隋唐以前。河與淮分。自入海。宋中葉以後。河合於淮。以趨海。然前代河決。不過壞民田廬。至明。則妨漕矣。故視古尤急。十四年春三月。工部右侍郎王永和奏治河事宜。先是。沙灣之役。永和以冬寒遽停工。又以決自河南。敕彼共事。上切責之。至是。言黑陽山西灣已通。水從泰通寺資運河。東昌則置分水閘。設三空。泄水入大清河。歸於海。八柳樹工猶未可用。沙灣隄宜時啓分水二空。瀉上流。庶可亡後患。從之。

景帝景泰三年春二月。河決沙灣隄。命左都御史王文巡視河道。四年冬十月。以左諭德徐有貞爲右僉都御史。遣治張秋決河。先是。河溢滎陽。自開封城北。經曹濮。以入運河。至兗州沙灣之東隄。大洪口而決。濟汶諸水皆從之入海。會通河遂淤。漕運艱阻。工部尙書石璞侍郎王永和。都御史王文相繼治之。凡七年。皆績弗成。乃集廷臣議於文淵閣。舉可治水者。以有貞名。上乃進有貞都察院右僉都御史治之。河以決故涸。而有貞至。方冬月。水暴漲。公私之艘畢達。治河卒踰數萬人。悉與之期而遣之。乃乘輕航究河源。遂踰濟汶至衛汴。循大河道。濮范還。上疏曰。臣聞平水土要在知天時。地利。人事而已。蓋河自雍而豫。出險之平。水勢旣肆。又由豫而兗。土益疎。水益肆。沙灣之東。所謂大

洪口者適當其衝。於是決而奪濟。汶入海之路以去。諸水從之而洩。隄潰渠淤。澇則溢。旱則涸。此漕途所由阻。然欲驟湮。則潰者益潰。淤者益淤。今請先疏上流水勢。平乃治決。決止乃濬淤。多爲之方。以時節宜。俾無溢涸。必如是而後有成。上從之。

七年夏四月。僉都御史徐有貞治河功成。先是有貞疏上。旣報可。乃鳩工。而前所遣卒亦依期至。乃爲渠以疏之。中置閘以節宣之。渠起金隄。張秋之首。西南行九里至濮陽。灤又九里至博陵坡。又六里至壽張沙河。又八里至東西影塘。又十有五里至白嶺灣。又三里至李嶺。由李嶺而上。又二十里至蓮花池。又三十里至大瀦潭。乃踰范暨濮。又上而西。凡數百里。經澶淵以接河沁。有貞曰。河沁之水過則害。微則利。乃節其過而導其微。用平水勢。旣成。渠名廣濟。閘名通源。渠有分合。而閘有上平。凡河流之旁出而不順者。則堰之。堰有九長各萬丈。九堰旣設。水遂不東衝沙灣。而更北出濟漕渠。阿西。鄆東。曹南。鄆北。出沮洳而資灌溉者。爲田百數十萬頃。凡堰。槌以水門。繚以虹隄。堰之崇三十餘尺。其厚什之。長百之。門之廣三十六丈。厚倍之。堤之厚如門。崇如堰。長倍之。架濤截流。柵木絡竹。實之石而鍵以鐵。蓋合五行。用平水性。而導汶泗之源。出諸山。匯澶濮之流。納諸澤。又濬漕渠。由沙灣北至臨清。凡二百四十里。南至濟甯。凡三百一十里。復建閘於東昌之龍灣。魏灣者八。積水過丈。則開而洩之。皆道古河以入於海。用平水道。初議者欲棄渠勿治。而由河沁及海以漕。又欲出京軍疏河。有貞因奏。獨瀕河民馬牧庸役。專力河防。以省軍費。紓民力。工部請如有貞言。不中制。以是得有功。蓋三年而告成。是役也。聚而閒役者四萬五千人。分而常役者萬三千人。用木大小十萬。竹倍之。鐵斤十有二萬。錠三千。緇八百。釜二千八百。麻百萬斤。荆倍之。藁

積又倍之。而用石若土不可算。然用糧於官僅五萬石。功成。進副都御史。初。有貞方鳩功。有言沮者。上使中使問之。有貞示以二壺。一壺之竅一。一壺之竅五。注水二壺。五竅先涸。中使還報。上。上惟有貞之所爲。有貞常欲築一決口。下木石則若無者。心怪之。聞僧居山中有道。有貞往叩焉。僧無所答。徐曰。聖人無欲。有貞沈思竟日。悟曰。僧言龍有欲也。此其下有龍穴。吾聞之。龍惜珠。吾有以制之矣。鐵能融珠。乃鎔鐵數萬斤。沸而下之。龍一夕徙。而決口塞。

孝宗宏治二年夏五月。河決開封入淮。復決黃陵岡入海。

三年夏四月。河決原武。命戶部左侍郎白昂往治之。河決支流爲三。其一決封丘金龍口。漫於祥符長垣。下曹濮。衝張秋長堤。一出中牟。下尉氏。一汜溢於蘭陽。儀封。考城。歸德。以至於宿。瀾漫四出。不由故道。禾盡沒。民溺死者衆。議者奏遷河南藩省以避其害。左布政使徐恪力陳不可。乃止。命昂往治之。昂舉南京兵部郎中婁性協治。乃築陽武長堤以防張秋。引中牟之決以入淮。浚宿州古睢河以達泗。自小河西抵歸德飲馬池。中徑符離橋而南。皆浚而深廣之。又疏月河十餘以殺其勢。塞決口三十六。由河入汴。汴入睢。睢入泗。泗入淮。以達於海。水患稍息。昂又以河南入淮非正道。恐不能容。乃復自魚臺歷德州至吳橋。修古河隄。又自東平北至興濟鑿小河十二道。引水入大清河及古黃河以入海。河口各作石堰。相水盈縮。以時啓閉。蓋東北分治。而東南主疏云。

五年秋七月。張秋河決。命工部侍郎陳政督治之。時河溢沛梁之東。蘭陽。鄆城諸縣皆被其患。復決楊家金龍等口。東注潰黃陵岡。下張秋堤。入漕河與汶水合。而北行張秋堤。乃遣政往政尋卒。

六年春正月命浙江左布政使劉大夏爲右僉都御史督治張秋決河。

七年春二月河復決張秋命平江伯陳銳太監李興協同都御史劉大夏督治之。先是大夏旣受命循河上下千餘里相度形勢乃集山東河南二省守臣議之上言河流湍悍張秋乃下流襟喉未可輒治治於上流分道南行復築長堤以禦橫波且防大名山東之患候其循軌而後決河可塞也疏上報可。工方興而張秋東堤復決九十餘丈奪運河水盡東流由東阿舊鹽河以入於海決口闊至九十餘丈訛言沸騰謂河不可治宜復元海運或謂陸輓雖勞無虞乃復命銳等協治之河南巡撫都御史徐恪上言臣按地志黃河舊在汴城北四十里東經虞城下達濟甯洪武二十四年決原武縣黑洋山東經汴城北五里又南至項城入淮而故道遂淤。正統十三年決於張秋之沙灣東流入海又決滎澤縣東經汴城歷睢陽自毫入淮景泰七年始塞沙灣之決而張秋運道復完以後河勢南趨而汴城之新河又淤。宏治二年以來漸徙而北又決金龍口諸處直趨張秋橫衝會通河長奔入海而汴南之新河又淤。百餘年閒遷徙數四千里之內散逸瀾漫乃者上廬聖衷特命都御史劉大夏經理而伏流橫溢功力未竟議者以黃陵岡之塞口不合張秋之護堤復壞遂謂河不可治。至有爲海運之說者得毋以噎而廢食哉。夫黃陵岡口不可塞者非終不可塞也。顧以修築堤防之功多疏濬分殺之功少故湍悍之勢不可遽回。今自滎澤縣孫家渡口舊河東經朱仙鎮下至項城縣南頓猶有涓涓之流計其淤淺僅二百餘年若疏而濬之使之由泗入淮以殺上流之勢又以黃陵岡賈魯舊河南經曹縣梁進口下通歸德丁家道口且可以分水勢。今梁進口以南則滔滔無阻以北則淤塞將平計其功力之施僅八十餘里若疏而濬之使之由徐入淮以殺

下流之勢水勢既殺。則決口可塞。運道可完。毋求近功。毋惜小費。毋以小債敗輒阻。幸而成功。則萬世之利也。命下部議行之。山東按察司副使楊茂仁上言。官多則民擾。治河既委。劉大夏又命李興、陳銳。事權分而財力匱。且水陰也。其應爲宮闈。爲四彝。宜戒飭后戚。防禦邊患。疏上。興等切齒之。誣茂仁爲妖言。逮繫獄。科道交章論救。乃譎同知茂仁。守陳子也。夏四月。塞張秋堤。更名安平鎮。先是。劉大夏發民丁數萬於上流。西岸鑿月河。三里許。屬之舊河。使漕通。不與河爭道。乃浚孫家渡口。別開新河一道。導水南行。由中牟至潁州。東入於淮。又浚祥符四府營縣淤河。由陳留至歸德。分爲二道。一由宿遷。小河口。一由亳州。渦河。會於淮。又於黃陵岡南浚賈魯舊河四十里。由曹縣出徐州。支流既分水。勢漸殺。乃築西長堤。起河南胙城。經滑。長垣。東明。曹單諸縣。盡徐州。長三百六十里。五旬而事竣。費輕功重。逾於徐有貞云。鹽書褒賞。入爲戶部右侍郎。始河自清河隙入淮。大夏治之。自宿遷。小河入淮。則北三百里矣。已又北三百里。至徐州。小浮橋入淮。九月。加山東參政張縉秩爲通政。使代劉大夏理河道。初。大夏治決河。委縉調度。及成功。遂陞爲通政司右通政。時衝決之餘。溝防不治。縉相其緩急。以漸修濬。無所遺。又於決口之東。砌石岸數里。以固舊防。又新築南旺東堤。樹柳其上。每歲夏秋水溢。挽卒得分行無阻。至今便之。武宗正德四年。河決曹單。趨沛。出飛雲橋。命工部侍郎崔巖往治。巖發丁夫四萬餘人。塞垂成。漲潰。代以右侍郎李鏜。四月弗成。盜起而罷。七年秋九月。以右都御史劉愷總理河道。愷築大堤。起魏家灣。互八十餘里。至雙堦集。都御史趙璜。又堤三十里。續之。曹單以甯。

世宗嘉靖七年春正月。鑿新漕。不成。先是。河決曹單城武陽家口。梁靖口。吳士舉莊。衝雞鳴臺。沛北皆爲巨浸。東溢逾漕。入昭陽湖。沙泥聚壅。運道大阻。刑部尙書胡世甯上言。運道之塞。河流致之也。請先述治河之說。河自經汴以來。南分二道。其一出滎澤。經中牟。陳穎。至壽州入淮。其一出祥符。經陳留。睢。毫。至懷遠入淮。其東南一道自歸德。宿虹。出宿遷。其北分新舊五道。一自長垣。曹鄆。出陽穀。一自曹州。雙河口。出魚臺。場場。一自儀封。出徐州。小浮橋。一出沛縣。飛雲橋。一出徐。沛之閒。境山之北。溜溝。此六者皆入漕渠。而南匯於淮。而今且堙塞矣。止存沛縣一河。勢合岸狹。不得不溢。所以豐沛。徐州。漫爲巨浸。溢入沛北之昭陽。以致運道壅淤。然壅淤旣久。勢必復決。決而東南有山限隔。其禍小。決而東北。前宋澶州之決。郡縣數十皆灌。禍不可言矣。故今治河當因故道。而分其勢也。其陽穀。魚臺。二道勢近東北。不可復開。而汴西滎澤。孫家渡。至壽州。一道決宜常濬。以分上流之勢。自汴東南原出。懷遠。宿遷。小浮橋。溜溝。口道宜擇其便利者。開濬一道。以分下流之勢。或恐豐沛漫流久。而北徙。欲修城武以南廢隄。至於沛縣之北。廟道口。以塞新決。而防其北流。此亦一計也。至於運道。臣與李承勛同行擬議。莫若於昭陽湖左。滕沛。魚臺之中。地名獨山。新安社。諸處別開一河。南接留城。北接沙口。闊五六丈。以通二舟之交。來冬冰結。船止。更加濬闊。以爲運道。此其上策也。至是。河道都御史盛應期上言。宜於昭陽湖左。別開新渠。北起姜家口。南至留城。一百四十餘里。以通漕舟。其說與世甯合。工部尙書童瑞覆議從之。乃集民夫萬人。分標開鑿。已而其地居河上流。土皆沙淤。功弗就。應期日夜止宿水次。益卒數萬。治之。百姓滋怨。言者謂糜財用。勞民力。功必不可成。上怒。奪應期官。歸田里。而新渠之議寢焉。以侍郎潘希曾往代。踰年。豐沛。單。三縣隄成。

十三年。初。飛雲橋之水北徙。魚臺穀亭。舟行闌面。豐沛以北稍遠。水患久之。復決趙皮寨。穀亭流絕。而廟道口復淤。議者欲引沁鑿衛。置敖倉衛輝。由渦經汴達陽武。陸輓之。始由衛北運。言人人殊。時治河者工部侍郎劉天和。專修復故道。未幾。河忽自夏邑大邱等集衝數隙。轉東北流。經蕭縣。出小浮橋下。濟二洪。趙皮寨。尋塞。蓋河勢南徙。

十九年。河決睢州野雞岡。經過入淮。二洪大涸。上命兵部左侍郎王以旂督理。以旂役丁夫七萬。開李景高支河一道。引水出徐濟洪。八月而成。糧運無阻。上悅。加以旂秩。尋復淤。是時河益南徙。頗便漕。然五河蒙城臨淮諸州邑。鳳泗之北。祖陵在焉。議者以爲憂。

三十一年。秋八月。河決房村。至曲頭集。凡決四處。淤四十餘里。都御史曾鈞役丁夫五萬六千有奇。濬之。三閱月而成。

三十七年。河北徙新集。淤而爲陸。二百五十餘里。視故道高三丈有奇。河分流弱。離爲十一。河南山東徐邳皆苦之。

四十四年。秋七月。河盡北徙。決沛之飛雲橋。橫截逆流。東行踰漕。入昭陽湖。汜濫而東。平地水丈餘。散漫徐促沙河。至二洪。浩渺無際。而河變極矣。初。漕渠左視昭陽湖。其地沮洳。去河不數十里。識者危之。嘉靖初。盛應期督漕。議鑿渠湖左。以避河患。朝廷從之。鳩工未半。爲異議所阻。至是。漕堙。以吏部侍郎朱衡出督濬。鑿衡與僉都御史潘季馴。尋應期所開故道。以爲運道之利。無踰於此。疏請鑿之。開新河。自南陽達留城。百四十一里。濬舊河。自留城達境山。五十三里。役丁夫九萬餘。八閱月而成。而水始南趨秦溝。

穆宗隆慶元年春正月。開廣秦溝以通運道。先是。河決沛縣。議者請復故道。乃議新集。郭貫樓諸處上源。尙書朱衡言。古之治河。惟欲避害。今之治河。兼欲資利。河流出境山之北。則開河淤。出徐州之南。則二洪。洄惟出自境山。至徐州小浮橋四十餘里。閒乃兩利而無害。自黃河橫流。碣山郭貫樓支河皆已淤塞。改從華山。分爲南北二支。南出秦溝。正在境山以南五里許。此誠運河之利也。惟北出沛西及飛雲橋。逆上魚臺。爲患甚大。陛下不忍沛魚之民橫罹昏墊。欲開故道。臣考之地形。參之輿論。其不可者有五。自新集至兩河口。皆平原高阜。無尺寸故道。可因。郭貫樓至龍溝一帶。頗有河形。又係新淤。無可駐足。其不可一也。河流由新集。則商虞夏邑受之。由郭貫樓。則蕭碭受之。今改復故道。則魚沛之禍。復移蕭碭。其不可二也。黃河西注華山。勢若建瓴。欲從中鑿渠。挽水南向。必當築壩。爲力甚難。其不可三也。曠日持久。役夫三十萬。騷動三省。其不可四也。工費數百萬。司農告匱。其不可五也。臣以爲上源之議。可能。惟廣開秦溝。使下流通行。修築長隄。以防奔潰。上從之。乃鑿舊渠深廣之。引鮎魚諸泉。薛沙諸河。其中注灞三河口。疏舊河。築馬家橋隄道之。出飛橋雲者。使盡入秦溝。自留至赤龍潭。又五十三里。凡爲閘八。減水閘二十。爲壩十有二。隄三萬五千二百八十丈。石隄三十里。已而鑿王家口。導薛河入赤山湖。鑿黃甫。導沙河入獨山湖。凡爲支河八。旱則資以濟漕。潦則洩之昭陽湖。運道盡通。是名夏鎮河。工成。加衡太子少保。於是河專由秦溝入洪。而河南北諸支河悉并流秦溝。

三年秋七月。河水溢。自清河抵淮安城西。淤者三十餘里。決方信二壩出海。平地水深丈餘。寶應湖隄崩壞。山東莒郟諸處水溢。從沂河直河入邳州。人民溺焉。

四年秋九月。河決邳州。自睢甯白浪淺。至宿遷小河口。淤百八十里。溺死漕卒千人。失米二十餘萬石。繼督河道侍郎翁大立言。邇來黃河之患不在河南。山東豐沛而專在徐邳。故欲先開泇河以遠河勢。開蕭縣河以殺河流者。正謂浮沙壅聚。河面增高。爲異日慮耳。今秋水游至。橫溢爲災。臣以爲權宜之計。在棄故道而就新衝。經久之策。在開泇河以避洪水。疏下部。

五年。河決雙溝。先是河漲徐州。上下茶城至呂梁兩厓。東山不得下。又不得決。至是乃自雙溝而下。北決油房曹家青羊諸口。南決關家曲頭集馬家淺閻家張擺渡王家房家白糧淺諸口。凡十一枝流。旣散。幹流遂微。乃淤自匙頭灣八十里。而河變又極矣。趙孔昭翁大立前後治之無功。議者欲棄幹河而行舟於曲頭集大枝閒。冬初水落。則幹已平沙。而枝復阻淺。又議棄黃河運而膠河泇河海運紛沓。莫可歸一。於是卽家起都御史潘季馴治之。季馴之治水。惟求復故道而已。乃上言老河故道自新集歷趙家圈出小浮橋。安流無患。後因河南水患。別開一道。出小河口。本河漸被沙淺。嘉靖閒河北徙故道。遂成陸地。臣奉命由夏鎮歷豐沛至崔家口。由崔家口歷河南歸德虞城夏邑商邱諸縣至新集。則見黃河大勢已直趨潘家口矣。父老言去此十餘里。自丁家道口以下二百二十里。舊河形跡見在。可開。臣卽自潘家口歷丁家道口馬牧集韓家道口司家道口牛黃垆趙家圈至蕭縣一帶。皆有河形。中間淤平者四分之一。河底皆滂沙。見水卽可衝刷。臣以爲莫若修而復之。河之復。其利有五。從潘家口出小浮橋。則新集迤東河道俱爲平陸。曹單豐沛永無昏墊。一利也。河身深廣。每歲免泛溢之患。虞夏豐沛得以安居。二利也。河從南行。去會通河甚遠。閘渠無虞。三利也。來流旣深。建瓴之勢。導滌自易。則徐州以下河身亦因而深刷。四利

也。小浮橋來流既遠，則秦溝可免復衝，而茶城永無淤塞之患。五利也。既報可，乃役丁夫五萬開匙頭灣，塞十一口，大疏八十里，故道漸復，已而以漕舟壞，季馴閑住。

六年春，河決邳州，運道阻，總河侍郎翁大立復議開泇河以遠其勢。潘季馴言：泇與黃河相首尾，今河南決，淮揚北決，豐沛漕渠不相屬，泇處中將焉用之？已而以漕舟壞，季馴被劾歸。給事中維遵言：治河有效，無如工部尙書朱衡者，乃詔衡與總河都御史萬恭覆視，則泇口限嶺阻石，竟報罷，而一意事徐邳河。衡上言：茶城以北防黃河之決而入，茶城以南防黃河之決而出，故自茶城至邳州宿遷，高築兩隄，宿遷至清河，盡塞決口，蓋防黃河之出，則正河必淤，昨歲徐邳之患是也。自茶城秦溝口至豐沛，曹單以接縷水舊堤，蓋防黃河之入，則正河必淤，往年曹沛之患是也。二處告竣，沛縣窰子頭至秦溝口，應築堤禦之，命萬恭總理其事，役丁夫五萬，有奇，分工畫地而築之。夏四月，兩隄成，北堤起磨臍溝，迄邳州之直河，南堤起離林鋪，迄宿遷之小河口，各延袤三百七十里，渾艘束於河流，睢邳之閒可以稼，建鋪立舍，設軍民守之。如河南山東黃河例，河乃安運道，嘉隆之閒，治河者以衡、恭、季馴爲能。

神宗萬曆五年秋八月，河決崔鎮，淮決高家堰，橫流四溢，連年不治，詔復以潘季馴爲右都御史，總理河漕。時有議當疏海口者，季馴言：海口不能以人力疏治，而可以水勢衝決，計莫如築高家堰，塞崔鎮東河，淮正流使竝趨入海，上可其奏。季馴爲之三年，而高家堰成一夕，黃浦涸，得龍首以獻，其大專車，時以比龍首渠云。

十五年冬十月，命工科給事中韋居敬相度黃河，議修治之策。時黃河漫流，自開封封邱，偃師及東明，長

垣多衝決。大學士申時行言：失今不治，河將北徙上流，不下徐淮，則運道可憂。故有是命，已而督河楊一魁議：因決濟運，導沁入衛，居敬言衛輝城卑於河，恐一決有衝潰之患。沁水多沙善淤，入漕未便，不如堅築決口，開河身，加浚衛河，民得灌田，尤爲完計。上從之。

十六年春三月，禮科給事中王士性上言：黃河自徐而下，河身高而束，以堤行，堤與徐州城平，委全力於淮，而淮不任。黃水乘運河，如建瓴。淮安高寶興鹽諸生民託之一丸泥，決則盡化魚鼈，而議者如蟻穴漏卮，補救無甯歲。總不如復故道，爲一勞永逸之計也。河故道由桃源三義鎮達葉家衝，與淮合。在清河縣北，別有濟運一河，在縣南，蓋支河耳。河強奪支河，直趨縣南，而自棄北流之道。久且斷，河形固在也。自桃源至瓦子灘九十里，地無蘆墓之礙，至開河費視諸稅稍倍，而河道一復，爲利無窮。章下所司，章居敬言：故道難復，不行。復議開警家營支河，尋諸決口皆塞，淤者復疏。夏六月，總理河道潘季馴上言：河水濁而強，汶泗清而弱，交處則茶城也。每至秋，黃水發入淮，沙停而淤，勢也。黃水減，漕水從之，沙隨水流。河道自通，縱有淺阻，不過旬日，往者立石洪，內華二閘，遇水發，卽閉之，以遏其橫。黃水落，則啓之，以出泉水。但建閘易守，閘難貢，使之馳行，勢要之開放，急不能待，而運道阻矣。乞禁啓閉之法，報可。

十七年河決雙溝單家口，於是專議築趙皮寨至李景高口遙堤，築將軍廟至塔山長堤，築羊山至土山橫堤，河防幸無事。

十九年秋九月，泗州大水，淮水泛溢，高於城，溺人無算，浸及祖陵。總督河道潘季馴上言：水性不可拂，河防不可弛，地形不可強，治理不可鑿。人欲棄舊以爲新，而臣謂故道必不可失。人欲支分以殺勢，而臣謂

濁流必不可分。霖霖水漲。久當自消。時季馴凡四治河。河皆治。季馴之議以爲河性湍悍。善徙者水漫而沙壅也。法莫若以隄束水。以水攻沙。循河故道。束而湍之。使水疾沙刷。無畱行。而又近爲縷隄。縷隄之外復爲遙隄。故水益淺遠。不至旁決。

二十三年夏四月。命工科給事中張企程勘淮泗工。先是邳州高郵寶應大雨水。湖決壞隄。泗州水浸祖陵。巡按御史牛應元言。治河在闢清口浮沙。次疏草灣下流。達伍港灌口。廣其途入海。次開周家橋。達芒稻河入江。而鮑王諸口決爲巨浸。難以施工。或分其水築黃涸戎口之壩。疏符離集睢水之淺。潘宿遷小河入黃之口。故有是命。已而企程覆奏。隆慶末高寶淮揚告急。當事狃於目前。清口旣淤。又築高堰。隄張福以束之。障全淮。以角黃舉七十二溪之水。堰於泗者僅口數丈。出之。出之十一。瀦之十九。河身日高。安得不倒溢。以灌泗乎。今高家堰費鉅。未可議廢。且并高寶淮揚。亦不可少。周家橋北去高堰五十里。其支河接革子湖。若浚三十餘里。一自金家河入芒稻河注之江。一自子嬰溝入廣洋湖注之海。則淮水泄矣。武家墩南距高堰十五里。偪永濟河。引水自窰灣閘出口。直達涇河。自昭陽湖入海。則淮之下流有歸。此急救祖陵之議也。九月。總督漕運褚鐵議導淮。總理河道楊一魁議先分黃。次導淮。御史牛應元議合行之。又爲祖陵計。黃埭口決。當制小林口淤。當挑歸仁隄。當培上從之。括帑五十萬。役夫二十萬。分黃導淮。自黃江鬻導河分趨五港灌口徑入海。以殺黃勢。毋盡入淮。導淮則自清口闢積沙數十里。又於高堰旁若周家橋。武家墩稍引淮支流入於湖。爲預浚入江入海路。以泄之。祖陵水漸退。而水患息。

二十四年九月戊戌。河工成。總理河道楊一魁。總督漕運褚鐵等賞賚有差。

二十五年春正月壬寅河決黃堦口總督漕運尙書褚鐵言黃口宜塞否則全河南徙害將立見三月
濬小浮橋沂河口小河口工成自河南徙徐邳復見清泗議者謂全河水微妨運決口不塞恐下齧歸仁
爲二陵患獨總河尙書楊一魁謂黃堦口深淵難塞議浚小浮沂泗築小河口工成果利運尋久旱運河
澀而河又決義安東壩一魁議浚黃堦口及上歸灣活鬣以受黃水救小浮橋泗上之涸因繪河圖上言
黃河自古爲患近自分黃道淮工成鳳泗淮揚免昏墊之災又自黃堦一決全河南徙兗豫徐邳得免河
患而其餘波出於義安者又導之入小浮橋足以濟二洪之涸則今日之河既有合於決隄放水之議矣
而議者猶曰運道有淺澀之虞祖陵有意外之患地方有淹沒之苦不知國家運道原不資於河全河初
出亳壽之郊以不治治之故歲無治河之費其後全河漸決入運因遂資其灌輸五十餘年久假不歸又
日築垣而居之涓滴不容外洩於是濁沙日澱河身日高上過汶泗則鎮口受淤魚滕被侵下壅清淮則
退而內瀦肝泗爲魚以至瀕河沒溺歲運飄流甚至浸及祖陵而當事者猥以運道所資勢不能卻之他
徙臣奉明命改絃易轍首開武墩涇河次疏具壩固莊又挑小浮橋小河口沂河口故道幸小浮橋股引
之水李吉口未斷之流已足濟運矣以汶泗沂兗之水建閘節宣運道自在固不必殫力決塞以回全河
蓋決河所經有山西阜子諸坡湖以爲之匯有小河白洋固朱等河溝以爲之委祖陵雄據上游崇岡疊
嶂諒無可慮卽歸仁一隄見爲險要亦非水衝萬一失守亦不過下浸桃清由洪澤諸湖以下清口勢不
能逆流倒灌上及肝泗也至南流汎濫雖不免爲下邑民生之害碭山水道當衝南流北流俱不得免必
須遷城以避河患其以涸口被災者惟有蕭宿靈睢往者全河未徙之時豐沛魚滕徐邳不被淹沒乎近

庚寅癸巳之秋徐邳二州不幾爲魚鱉乎較之今日孰重孰輕故臣始終自信以爲止就已成之功稍終未完之緒則自不至爲運道之虞亦不能爲陵寢生民之患抑臣又有說焉禹之導河析二渠播九河隨水之所向不與爭利今河南山東江北州縣碁列星布在在堤防水不及汴梁矣則恐決張秋不及張秋矣又恐淤鎮口不及鎮口矣又恐淹宿州凡禹之所空以與水者今皆爲我所占無容水之地固宜其有衝決也今若空碭山一邑之地北導李吉口下濁河南存徐溪口下符離中存盤岔河下小浮橋三河竝存南北相去五十里任水游蕩以不治治之量蠲一邑千金之賦歲省修河萬金之費此亦一時之省事萬世之良圖也

二十六年春三月工科給事中楊應文請開沔河沔河在滕嶧沂沭下流南通淮海隆慶以來翁大立數議未決舒應龍嘗鑿韓莊中輟時河決黃堍口請終其功報可夏六月以工部侍郎兼右僉都御史劉東星總理河道漕運東星循行河堤謂阻漕治在標決河治在本兩利而竝存之議開趙渠蓋商城虞城以下至於徐州元賈魯故道也嘉靖末北徙潘季馴議開之計費四百萬而止及河決單縣黃堍口稍通成渠惟曲里館至三仙臺四十里如故東星因欲浚之又自三仙臺至泗州小浮橋開支河又濬漕河起徐邳至宿費可十萬緡

二十九年秋九月河決蕭家口先是開封歸德大水商城蒙城等處河衝蕭家口百餘丈全河南徙淮泗賈舟不及去置於沙上總督河漕工部尙書劉東星卒於濟甯東星浚趙渠開沔河工未竟而卒十一月河南道御史高舉言膠萊海運嘉靖閒山東副使王憲議開膠萊河河之南口起麻灣北口至海滄

相距三百三十里。其地河形至今尚在。兩口皆貯潮水。不假濬者二百餘里。濬者一百三十里。但其下多石。水微細。使極力開鑿。止三十里遠耳。如河成。我江漕由淮安。清江浦。歷新壩。馬家濠。而來。計良便。國初罷海運者。以馬家濠未通。舟出大洋故也。馬家濠通。舟行小海中。自不險。從麻灣。海滄二口。徑抵天津直沽。至是舉循其議。上格於守臣而止。

三十一年春正月。山東巡撫黃克纘言。開王家口爲蒙牆上流。上流既達。則下流不宜旁泄。宜塞從之。夏四月。總理河道侍郎曾如春卒。如春治河。力主開黃家口。領六十萬金。竭智畢慮。既開新河。雖深廣。其南反淺隘。故水不行。所決河廣八十餘丈。而新河僅三十丈。不任受。或告如春曰。若河流既回。勢如雷霆。藉其自然之勢衝之。何患淺者之不深。如春遂令放水。河流濁下。皆泥沙。流勢稍緩。下已淤半矣。一夕水漲衝魚臺。單縣。豐沛。閒如春聞之。驚悸暴卒。以工部右侍郎李化龍總理河道。

三十二年春正月。總理河道侍郎李化龍請開泇河。曰。河自開封歸德而下。合運入海。其路有三。由蘭陽出茶城向徐。邳名濁河。爲中路。由曹。單。豐。沛出飛雲橋向徐溝。名銀河。爲北路。由潘家口入宿遷。出小河口。名符離河。爲南路。南路近陵。北路近運。惟中路既遠於陵。亦濟於運。前督臣排羣議。興茲役。竟以資用乏絕。不得竣事。然自堅城以至鎮口。河形宛然。故爲今計。惟守行隄。開泇河爲便。上從之。秋八月。河決蘇家莊。淹豐沛。黃水逆流。灌濟甯。魚臺。單縣。而魚臺尤甚。九月壬申。分水河成。

三十三年秋七月壬午。呂梁河澀。給事中宋一韓論前總督李化龍泇河之誤。不報。

三十四年夏四月癸亥。河工成。自朱旺口至小浮橋。袤百七十里。河歸故道。役五十萬人。費八十萬金。五

閱月而竣。

懷宗崇禎六年夏五月。運河淺阻。降總理河道尚書朱光祚一級。

七年冬十一月。漕運總督楊一鵬議濬沕河。從之。

八年秋九月。逮總理河道尚書劉榮嗣。初。榮嗣以駱馬湖阻運。自宿遷至德州開河注之。既鑿。黃水朝暮遷徙。不可以舟。給事中曹景參劾之。被逮。

九年夏四月。沕河重濬成。

十五年秋九月。李自成圍開封。河決。城陷。先是。開封城北十里枕黃河。至是。賊圍城久。人相食。壬午夜。河決。開封之朱家寨溢。城北越數日。水大至。灌城。周王恭枋走磁州。以巡按御史王漢舟迎之也。巡撫高名衡。推官黃澍等俱北渡。吏卒倉卒各奔避。士民淹溺死者數十萬人。城俱圯。賊屯高地。獨全。開封古都會。富庶甲於中原。竟成巨浸。水大半入濁。入泗。入淮。與故河分流。邳。亳皆災。

谷應泰曰。河自龍門下浮。束於萬山。南至豫州。地平勢怒。而河無安流矣。故河之決。必在河南。而既決之後。不南侵全淮。卽北衝齊魯。侵全淮者。潰散於潁。亳。徐。宿。而害在田廬。民業衝齊魯者。橫激於曹。濮。單。鄆。而患兼在隄防。運道然。淮近而身大。決入淮者。患小。而治速。漕遠而身小。決入漕者。患大而治難也。洪武初。河決原武。自潁。壽入淮。正統十三年秋。河決滎陽。入漕。潰沙灣入海。景泰三年春。河又決沙灣。宏治二年夏。河決開封入淮。三年夏。河決原武。支流三。一自封邱下衝張秋。一出中牟尉氏。一溢蘭陽及歸德。瀾漫至宿。五年秋。河決張秋。七年春。河又決張秋。世宗十九年。河決睢州野雞岡。四十四年。河決沛之飛雲。

橋。神宗五年。河決崔鎮。二十五年。河決黃堽口。懷宗十五年。河決汴城。大抵決口必在開封南北百里而
被害之地。淮三漕七。後乃駸駸數病。漕河焉。蓋合大河以歸一淮。物不能兩大。況水又泥淖多滓。驅二瀆
之水行闊過之途。其必潰也明甚。而兗州卑下。齊魯瀕海。黃河所向。并牽漕河諸水。盡瀉入海。故河決之
世。陸則病水。水則病涸。發則病水。去則病涸。齊魯病水。漕河病涸。一隅病水。全河病涸。而說者謂河既欲
自豫決。竟入漕達海。何不盡浚豫。竟諸決地。聽河北流。過濟甯。下臨清。出直沽。漕與河合。漕不病竭。淮與
河分。淮不病溢。策至便也。不知淮河浩瀚千里。一瀉猶不能洩。怒時思沸湧。漕水千步百折。委紆盤曲。河
豈能按轡徐行乎。若必廢漕制。以伸河體。取咽喉之地爲尾閭之衝。必無幸矣。故治河之道。古無上策。史
冊所載。不過三說。曰疏。曰浚。曰塞。塞在上流。堙谷截流是也。疏在下流。分支灑澤是也。浚在河身。築隄固
岸。使之安行是也。疏近上策。神禹北播九河。賈讓北放渤海。棄地遷民。費以鉅萬。效已難言之。近世以來。
浚塞兼施。徐有貞謂水平後可治決。決止乃可濬淤。此先塞繼浚之法也。故力築張秋金堤。堅塞決口。而
徐濬漕河之淤。水道乃平。劉大夏言河道不治。乃修築隄防之功多。疏濬分殺之功少。此先浚後塞之法
也。故力浚賈魯河孫家渡。殺水入淮。又浚淤河出宿遷。亳州入淮。後築長堤。起豫達徐。衝決遂止。他如潘
季馴之不失故道。不分濁流。楊一魁之首開武墩。次疏具壩。皆良策也。夫殷都帶河。鷲耿屢遷。武帝刑牲
宣瓠時決。終明之世。河患時警。未嘗一歲沮運者。浚塞之力也。九河故道已不能修。漕河一綫。勢不能廢。
然則塞浚之功。與河終始。尙其借鑒於茲。

卷三十五

南宮復辟易儲附

景帝景泰元年八月丙戌。上皇至自迤北。入居南宮。羣臣朝見而退。大赦天下。冬十月。命靖遠伯王驥守備南宮。十一月。上皇在南宮萬壽聖節。禮部尙書胡濙請羣臣朝賀。不許。既又請明年正旦百官朝。上皇於延安門。亦不許。荆王瞻塏表請朝。上皇有詔止之。

三年五月甲戌。廢上皇長子皇太子。見深爲沂王。出就沂邸。立皇子見濟爲皇太子。先是。上欲易儲。語太監金英曰。七月初二日。東宮生日也。英頓首對曰。東宮生日是十一月初二日。上默然。至是。上意既定。恐文武大臣不從。乃分賜內閣諸學士金五十兩。銀倍之。陳循。王文等遂以太子爲可易。時有廣西潯州守備都指揮黃珘者。思明土知府瑯庶兄也。瑯老子均襲知府。珘欲謀奪之。與其子矯軍門令。徵兵思明。率驍悍數千人。夜馳入瑯家。支解瑯父子。納甕中。瘞後圃。瑯僕福童潛走憲司。訴珘父子殺瑯父子狀。總兵武毅知之。疏聞於朝。珘懼。乃謀爲逃死計。遣千戶袁洪走京師。上疏請易太子。上大喜曰。萬里外有此忠臣。亟下廷臣集議。且令釋珘罪。予官都督。尙書胡濙。侍郎薛琦。鄒榘會廷議。王直于謙相顧胎愕。久之。司禮監太監興安厲聲曰。此事不可已。卽以爲不可者。勿署名。無得首鼠。持兩端。羣臣皆唯唯。署議。於是禮部尙書胡濙等上言。陛下膺明命。中興邦家。統緒之傳。宜歸聖子。黃珘奏是。詔從之。王直得所賜金。叩案頓足曰。此何等事。吾輩愧死矣。秋七月。殺太監阮浪。王堯時。浪侍上皇南宮。浪門下內豎王堯者。往監蘆溝橋。浪以上皇所賜鍍金繡袋及束刀貽之。堯偶飲錦衣衛指揮盧忠家。解衣蹴踘。忠見刀袋非常製。

命妻進酒醉之解其袋刀入告變謂南宮謀復皇儲遺刀求外應上怒殺浪堯猶欲窮治不已忠屏人詣卜者全寅筮之寅以大義叱之曰是大兇兆死不足贖忠懼乃佯狂學士商輅與司禮監太監王誠言盧忠狂言不可信壞大體傷至性所關不小事得寢後英宗復辟忠果伏誅寅山西安邑人少警性聰敏學京房易占斷多奇中四方爭傳之正統中客遊大同上皇既北狩陰遣使諭鎮守太監裴富富私問寅寅筮得乾之初九附奏曰大吉可以賀矣龍君象也四初之應也龍潛躍必以秋應以壬午浹歲而更龍變化之物也庚者更也庚午中秋車駕其還乎遠則必幽勿用故也或躍應焉或之者疑之也計七八年當必復辟午火德之王也丁者壬之合也其歲丁丑月壬寅日壬午乎自今歲數更九躍則必飛九者乾之用也南面子衝午也其君位乎故曰大吉也先欲奉上皇南還朝廷率以爲詐寅力言於石亨亨與于謙協議奉迎而歸及後復辟其言皆驗

四年春正月吏部尙書何文淵罷時言官劾文淵貪縱下獄文淵自言易儲有功詔書所云天佑下民作之君父有天下傳之子己所屬對也乃令致仕十一月皇太子見濟卒

五年夏四月御史鍾同上疏請復儲先是同嘗因待漏與儀制郎中章綸論易儲事繼之以泣至是遂上疏言宗社之本在儲位宜復不宜緩聞者竦之五月下禮部儀制郎中章綸御史鍾同於獄綸上修德弭災十四事又曰太上皇帝君臨天下十四年陛下嘗親受冊封爲臣子是天下之父也陛下宜率羣臣每月朔望及歲時節旦朝見於延安門以極尊崇之道而又復皇后於中宮以正天下之母儀復皇儲於東宮以定天下之大本疏上下錦衣獄鞠訊體無完膚御史鍾同先有言故併逮之以進士楊集爲六

安州知州集上書于謙曰。姦人黃瓚進易儲之說。以迎合上意。本逃死之計耳。公等國家柱石。乃戀官僚之賞。而不思所以善後乎。脫章綸鍾同死獄下。而公坐享崇高。如清議何。謙以示王文。文曰。書生不知朝廷法度。然有膽當進一級處之。進士選知州始此。譎給事中徐正。戍鐵嶺衛。正密請召見。便殿屏左右。言今日臣民有望上皇復位者。有望廢太子沂王嗣位者。陛下不可不慮。宜出沂王於沂州。增高南城數尺。伐去城邊高樹。宮門之鎖亦宜灌鐵。以備非常。上怒。謫戍。御史高平亦言城南多樹。事叵測。遂盡伐之。時盛暑。上皇嘗倚樹憩息。及樹伐。得其故。大懼。復辟後。正平皆伏誅。南京大理少卿廖莊上言宜篤親親之誼。時朝見上皇於南宮。上皇諸子。皇上之猶子也。亦宜令親近儒臣。以待皇嗣之生。使天下曉然知皇上公天下之心。不報。

六年八月。杖大理寺少卿廖莊。禮部郎中章綸。御史鍾同於闕。同死杖下。綸仍詔獄。謫莊定羌驛丞。先是。莊上疏忤旨。至是。赴京陛見。上念及命杖之。

英宗天順元年春正月壬午。武清侯石亨副都御史徐有貞等迎上皇復位。先是。景帝不豫。以儲位未定。中外憂懼。兵部尚書于謙日與廷臣疏請立東宮。蓋謂復憲宗也。中外藉藉謂大學士王文與太監王誠謀。白太后迎取襄王世子。十有一日。都御史蕭維楨同百官問安於左順門外。太監興安自內出曰。若皆朝廷大臣。不能爲社稷計。徒問安耶。即日。維楨集御史議曰。今日興安之言。若能達其意否。衆曰。皇儲一立。無他慮矣。衆還道作封事草。會稿於朝。衆謂上皇子宜復立。惟王文意他有所屬。陳循知文意。獨不言。李賢以問蕭鉉。鉉曰。旣退不可再。文遂對衆言曰。今只請立東宮。安知朝廷之意在誰。維楨因舉筆曰。我

更一字。乃更早建元良爲早擇。笑曰。吾帶亦欲更也。疏進。有候十七日御朝之旨。時武清侯石亨知景帝疾必不起。念請復立東宮。不如請太上皇復位。可得功賞。遂與都督張軫。太監曹吉祥。以南城復辟謀。叩太常卿許彬。彬曰。此社稷功也。彬老矣。無能爲矣。盍圖之。徐元玉。元玉。徐有貞字也。初名理。以己巳倡南遷議。朝廷薄之。後更名有貞。亨軾從其言。遂往來有貞家。有貞亦時時詣亨。人莫知也。是月十四日夜。會有貞宅。有貞曰。太上皇帝昔者出狩。非以遊畋爲國家耳。况天下無離心。今天子置不問。乃紛紛外求。何爲也。如公所謀。南城亦知之乎。亨軾曰。一日前已密達之。有貞曰。俟得審報。乃可。亨軾去。至十六日。既暮。復會有貞曰。得報矣。計將安出。有貞乃升屋。覽步乾象。亟下曰。事在今夕。不可失。遂相與密語。人不聞。而是時會有邊吏報警。有貞曰。宜乘此。以備非常。爲名。納兵入大內。誰不可者。亨軾然之。計定。倉皇出。有貞焚香祝天。與家人訣曰。事成。社稷之利。不成。門戶之禍。歸人不歸。鬼矣。遂與亨軾往會吉祥及王驥。楊善。陳汝言。收諸門鑰。夜四鼓。開長安門。納兵千人。宿衛士驚愕。不知所爲。兵旣入。有貞仍鎖門。取鎖投水竇。中曰。萬一內外夾攻。事去矣。亨軾亦惟有貞處分。莫知所爲。時天色晦冥。亨惶惑。叩有貞曰。事當濟否。有貞大言曰。時至矣。勿退。率衆薄南宮。門錮不可啓。叩之不應。俄聞城中隱隱開門聲。有貞命衆取巨木懸之。數十人舉之。撞門。又令勇士踰垣入。與外兵合。毀垣。垣壞。門啓。亨軾等入。見上皇燭下。獨出呼亨軾曰。爾等何爲。衆俯伏合辭云。請陛下登位。呼兵士舉輦至。兵士驚懼不能舉。有貞等助挽之。掖上皇登輦。以行。忽天色明霽。星月皎然。上皇顧問有貞等爲誰。各自陳官職姓名。入大內。門者呵止之。上皇曰。吾太上皇也。門者不敢禦。衆掖升奉天殿。武士以瓜擊有貞。上皇叱之。乃止。時黼座尙在殿隅。衆推之。使中遂升。

座鳴鐘鼓。啓諸門。是日百官入候。景帝視朝。既入。見南城暨殿上呼譟聲。尙不知故。有貞號於衆曰。上皇復辟矣。趣入賀。百官震駭。乃就班賀。上皇宣諭之。衆始定。景帝聞鐘鼓聲。大驚。問左右曰。于謙耶。既知爲上皇。連聲曰。好好。明日上皇臨朝。謂諸臣曰。弟昨日食粥。頗無恙。詔逮少保于謙。王文。學士陳循。蕭鎡。商輅。尙書俞士悅。江淵。都督范廣。太監王誠。舒良。王勤。張玉。下獄。命副都御史徐有貞。以本官兼翰林院學士。直內閣。典機務。尋晉兵部尙書。兼職如故。出前禮部郎中章綸於獄。擢禮部侍郎。上以綸建議復儲。出之獄。喜歎良久。遂有是擢。丁亥。殺少保兵部尙書于謙於市。先是己巳城下之役。石亨功不如謙。而得侯爵。心媿之。乃推謙功。詔予一子千戶。謙固辭。且曰。縱臣欲爲子求官。自當乞恩於君父。何必假手於石亨。亨聞恚甚。亨從子彪貪暴。謙奏出之。大同。亨益銜之。徐有貞者。常因謙求祭酒。景帝召謙。避左右。諭之曰。有貞雖有才。然奸邪。謙頓首退。有貞不知。亦恨謙。方上之復辟也。有貞嗾言官以迎立外藩議。劾王文。且誣謙下獄。所司勘之。無驗。金牌符敕。見在禁中。有貞曰。雖無顯跡。意有之。法司蕭維楨等。阿亨輩。乃以意欲二字成獄。文憤怒。目如炬。辯不已。謙顧笑曰。辯生耶。無庸。彼不論事。有無。直死我耳。獄具。上猶豫未忍。曰。于謙曾有功。有貞直前曰。不殺于謙。今日之事。無名。上意乃決。遂與王文及太監舒良。王誠。張永。王勤。斬東市。妻子戍邊。徼謙有再造功。上北狩。廷臣閒主和。謙輒曰。社稷爲重。君爲輕。以故也。先抱空質。上得還。然謙禍機亦萌此矣。景帝嘗賜謙甲第。謙頓首曰。去病。豎子。尙知此意。臣獨何人。而敢饜此。不許。乃置上前。後所賜璽書袍鎧弓劍冠帶之屬。於堂。而加封識。歲時一謹視。謙以國家多事。寓直房。不歸家。謙與中貴曹吉祥等共兵事。氣陵之。故小人無不憾謙者。謙既死。籍其家。無餘貲。蕭然僅書籍耳。而正室鎖

鑰甚固。則皆上賜也。謙死之日。陰霾翳天。行路嗟嘆。吉祥麾下指揮朵耳者。以觴醺地而慟。吉祥悲扑之。明日復齟慟如故。天下無不冤之。都督范廣勇而知義。爲謙所任。亨惡之。并斬廣。論迎復功。封武清侯。石亨爲忠國公。都督張軏爲太平侯。張輓爲文安侯。都御史楊善爲興濟伯。石彪封定遠伯。充大同副總兵。以袁彬爲錦衣衛指揮僉事。奪大同總兵郭登定襄伯。以爲南京都督僉事。召廖莊於定羌驛。賜還官。贈故御史鍾同大理寺左丞。諡恭愍。廕其子入太學。二月乙未朔。皇太后誥諭廢景泰帝。仍爲郕王。歸西宮。廢皇后汪氏。仍爲郕王妃。欽天監奏革除景泰年號。上曰。朕心有所不忍。可仍舊書之。郕王薨。祭葬禮悉如親王。諡曰戾妃。嬪唐氏等賜帛自盡。以徇葬。命汪妃出居舊王府。先是。景帝卽位。立妃爲皇后。后無子。有二女。次妃杭氏生見濟。景帝廢立時。后泣諫。以爲不可。景帝竟立見濟。而以杭氏爲皇后。以后諫故。幽之宮中。至是。上以郕王薨。欲令妃徇葬。大學士李賢曰。汪妃雖立爲后。卽遭廢棄。與兩女度日。若令隨去。情所不堪。況幼女無依。尤可矜憫。上惻然曰。卿言是。朕以爲弟婦。少不宜存內。初不計其母子之命。而皇太子雅知妃不欲廢立。事之甚恭。遂得出舊府。太子又時時護持之。悉得挾貲屬外。二女育宮中如故。由是母子得全。三月。封直內閣兵部尙書徐有貞爲武功伯。兼華蓋殿大學士。掌文淵閣事。初。于謙之獄。中外咸側目。有貞而有貞意。殊自得。請於石亨曰。願得冠側注。而從兄後。石亨爲言之。上曰。爲我語有貞。但僂力。不患不封也。居旬日。亨復言。上乃下詔封之。歲支祿一千一百石。子孫世錦衣指揮使。賜貂蟬冠玉帶。旬日之間。恩賜赫奕。與石亨張軏埒。夏四月。復立元子見深爲皇太子。襄王瞻墀來朝。先是。土木之變。王兩上疏慰安皇太后。乞命皇太子居攝大位。急發府庫募勇敢之士。務圖迎復。仍乞

訓諭邨王。盡心輔政。疏上。景帝已立八日矣。至是。得疏宮中。上覽之。感歎。手敕取王入朝。禮待甚隆。王辭歸。上送至午門。王伏地不起。上曰。叔父欲何言。王頓首曰。萬方望治如饑渴。願皇上省刑薄斂。上拱手謝曰。敬受教。六月。逮徐有貞下獄。曹吉祥。石亨。憾有貞。嗾諸閹巧詆。數爲險語。觸上。上殊不爲動。錦衣官門達復劾其阿比排陷石亨。詔執鞠之。降廣東參政。既有以飛章謗國是者。其語復多侵亨。吉祥於是復訴。上謂有貞實主使。逮歸置獄。窮達鍛鍊無所得。摘其語詞。續禹神功語爲所自草。大不敬。無人臣禮。當死。以雷震奉天門。宥爲黔首。謫戍雲南金齒。有貞去。而曹石日益專橫矣。

谷應泰曰。土木之變。司徒不戒。車駕蒙塵。九廟震驚。百官芟舍。國無長君。不幾青城五國乎。邨王膺統。喪君有君。天誘其衷。擁駕還國。當是時。新君有捉髮之迎。故主效止郊之哭。弟兄握手。且喜且悲。夫蘇李相違。河梁戀別。聲椒偶值。異國班荆。矧在同氣。又何能已。棠棣之詩。所爲作也。弟又北面稽首。恭上璽紱。兄且自陳失德。不敢復事宗廟。以臣避君。弟不先兄。景能辭位。史著美談。實則大寶已登。南向讓三。西向讓再。抑又何傷焉。至於菟裘營室。吾將老焉。千秋之後。願屬梁王。舍賢與子。如上皇何。廢不復興。如天下何。而乃初聞返蹕。不欲郊迎。旋入南宮。復止朝賀。勢且駸駸焉。登臺授兵矣。不幾貪天之位。應憎寡兄。實逼處此。繼乃授旨。廷臣廢深立濟。忘餘祭傳札之言。貽德昭憂死之漸。君子謂邨王末路。自同盜國。奪門之釁。身實召焉。若上皇者。亦宜追悔前愆。不預國事。夫平王東遷。春秋貶之。降爲王風。英宗身受祖宗重器。輕信宵小。被繫北庭。幸而脫還。亦已得罪祖宗矣。辟之闔外之吏。棄師而歸。封疆之吏。委城而走。高帝之法。尙當引繩批根。況在至尊。短垣而自踰之乎。卽至景帝賓天。羣臣力請。英宗亦宜開論至誠。明予漸德。

嗣王可輔。大統有人。玄宗出奔。靈武卽位。道君北狩。康構稱尊。父子兄弟之間。豈不克全無憾者與。而乃暮夜倉皇。驅車踐位。逼景帝於彌留。假閣弁於翼戴。奪門二字。英皇不得正始。景皇不得正終。授受之際。弟兄交失。而況升遐日月。史無明文。燭影斧聲。不無疑案。以至革除帝號。加戮于謙。夫景受國有名。非少帝昌邑之比。而謙功在社稷。豈產祿舞陽之徒乎。觀其軫念燹廢。撫恩弱息。豆其瓜蔓之涕。又何淫淫也。始知曹石所謀不臧。小人貽誤人國。刻薄寡恩。如是哉。獨惜于謙者。百折不回於社稷無君之日。不能出一言於東宮易位之辰。處人骨肉。自古其難。漢留唐鄴所由擅美千載也。

卷三十六

曹石之變

英宗正統六年春正月。以定西侯蔣貴爲征蠻將軍。太監曹吉祥監軍。兵部尙書王驥提督軍務。郎中侯璉主事。楊寧隨軍贊畫。討思任發。吉祥欒州人。出王振門下。至是監軍。號都督。多選降丁騎射。以從此內臣總兵之始也。

十二年春二月。以都督僉事石亨爲左參將。守萬全。亨渭南人。伯父巖。寬河衛指揮僉事。無子。亨嗣。亨善騎射。有膽略。方面豐軀。美髯及膝。提大刀輪舞如飛。每從征。挺刃先登。輒立奇功。累官都指揮使。姪彪亦驍勇。能挽強弓。善揮斧。以官舍從。亨有功。授大同衛鎮撫。是年亨爲都督僉事。彪亦爲指揮使。從亨參謀。十四年春正月。命太監曹吉祥監甯陽侯陳懋軍。進討鄧茂七餘黨。悉平之。事見平浙閩寇七月。上北狩。八月。太

后命邨王權總國事。逮宣府總兵楊洪。萬全左參將石亨繫錦衣獄。九月邨王卽皇帝位。出楊洪石亨於獄。命亨總京營兵。十月也先犯京師。于謙石亨分營城北。也先縱騎剽掠。焚三陵殿寢祭器。逼宣武門。南踰蘆溝橋。散劫下邑。謙督軍出德勝門背城而戰。時孫鏗范廣皆小捷。而亨功爲第一。也先宵遁。亨復追擊至定州清風店。敵懼且出。倒馬關。亨使給曰。石將軍行未至。來者皆假將軍名耳。敵以爲然。皆反戰。亨彪合擊之。大敗。始知石將軍在也。皆慟哭。盡棄其羊馬輜重。自紫荆關遁出。當是時。亨彪名震幕北矣。旣論功。封亨武清伯。尋進侯。彪都督僉事。爲大同左參將。

景泰元年閏正月。命鎮朔大將軍石亨都督范廣率兵出大同宣府。尋召還。八月石亨楊洪率師分道出紫荆居庸關。始立團營。曹吉祥劉永誠節制諸軍。此內臣總京營之始也。

三年春正月。普化可汗與也先仇殺石亨。請率兵出宣府。大同討寇復仇。不許。天順元年春正月。景帝不豫。會當郊。使石亨攝召命於榻前。亨見帝委頓狀。出與張軹張軹謀。謂帝疾必不起。不若迎復上皇。陰約徐有貞結太監曹吉祥。蔣冕內白皇太后。外爲飛語言于謙。且與王文謀立襄世子爲東宮。遂率其羣從子弟家兵與吉祥等夜叩南城。迎上皇復辟。乃譖于謙於上。殺之。論奪門功。又第一。進封忠國公。召彪大同。以爲都督同知。充遊擊將軍。其家人石甯等數十人皆授指揮千百戶。時吉祥已晉司禮監矣。姪欽封昭武伯。鐸鉉鑄皆都督。此內臣子弟封爵之始也。三月。以戶部侍郎陳汝言爲兵部尙書。汝言附石亨。曹吉祥謀奪門。故亨薦用之。及理部事。益阿比表裏爲奸。亨冒功陞賞不下四千餘人。天下都司及邊吏爭趨之。夏四月。石亨張軹請盡罷各邊省巡撫及提督軍務等官。從之。逮

巡撫大同都御史年富下獄。上問李賢曰：「年富何如？」賢曰：「行事公廉，在彼能革宿弊。」上曰：「此必石彪憚富不得遂其私耳。」賢曰：「陛下明見，真得其情。由是富得致仕歸田里。」削都御史王竑籍，安置江夏。石亨忌竑，嗾言官論其犯闕也。五月，石亨擅令守關軍放歸。徐有貞、李賢言於上，命別遣兵戍之。御史楊瑄劾太監曹吉祥、忠國公石亨奪民田，且言其怙寵擅權之罪。上顧徐有貞、李賢曰：「御史敢言如此，國家之福也。」曹吉祥在旁慚懼，已盛怒，欲罪之。上不許，及亨出兵歸，聞之怒，訴御史言不實。意賢有貞主使，乃激吉祥曰：「今在內惟爾，在外惟我，賢等欲排陷，其意可知矣。」初，吉祥見亨冒濫恩賞，頗不平，恆訐其短。至是聞亨言勢復合，六月，彗孛見，御史張鵬、周斌交章劾石亨諸不法事，疏未上，給事中王鉉知之，潛告亨。亨與曹吉祥馳訴上，謂鵬乃已僂兇豎，張永猶子，今結御史爲永報仇。上震怒，御文華殿，悉收諸御史面詰之。斌執彈章且誦，且對言亨事，且有驗。上曰：「事卽實，汝曹何不早言之？」下錦衣獄，問訊瀕死。逮大學士徐有貞、學士李賢、都御史耿九疇、下錦衣獄。初，有貞得首輔，欲立功名自異，稍與石亨左。李賢入閣，力助之，知無不言。曹吉祥不能堪，會御史張鵬等既詔獄，給事中王鉉、錦衣指揮門達乃上疏言九疇、阿附有貞，賢嗾御史排陷石亨。吉祥復乘閒頓首言：「臣等萬死一生，迎復皇上，內閣必欲殺臣，伏地哭不起。」上從之。乃逮有貞等置於理。會京城大風雹，拔木壞屋，走正陽門下馬牌於郊。吉祥門老樹皆折，亨家水深數尺餘。翼日，乃降有貞、賢參政。九疇右布政。張鵬、楊瑄等從末減戍邊衛。既而上曰：「近日行事，惟有貞一人，李賢不可去，命召還。」以贊善岳正直、文淵閣正以吏部尙書王翱薦，召見文華殿，特用之。正出赴閣，至左順門，石亨、張軌自外入，愕然曰：「何以至此？」正不敢對。時亨、軌已不平，比入見，上曰：「今內閣朕自求得一

人問爲誰。上曰：岳正。亨軌陽賀。上曰：官卑柰何。亨軌因奏曰：陛下陞正亦甚易。但姑試之。果稱職。未晚也。上默然。秋七月。有投匿名書指斥時政者。石亨曹吉祥請上出榜募能捕告者。賞以三品職。令內閣撰榜格。岳正言於上曰：爲政自有體。盜賊責兵部。奸宄責法司。豈有天子自出榜募購之理。時吉祥在傍。請甚力。上徐曰：正言是也。已而亨等譖徐有貞怨望。謫戍金齒。謫內閣贊善岳正爲廣東欽州同知。初入值文淵閣。上嘗召問曰：卿何以輔朕。正曰：今內臣武臣權過重。上頷之。正退。語曹欽石亨。令謝兵歸第。欽彪走告吉祥。吉祥詣上。垂泣免冠請死。具道所由。上曰：無之。乃召正責其漏言。正曰：固也。臣觀二家必有背叛之滅。卽今無可按之誅。臣欲全君臣共難情。故令早自爲計。上不悅。會承天門災。上命正草詔罪己。歷陳奸邪蒙蔽狀。亨見之怒。遂指爲謗訕。營內批有是謫。兵部尙書陳汝言者故恨正。復中以私事戍肅州衛。陳汝言阿曹吉祥意。取還征雲貴兩廣降丁。九月。敕左順關者今後非有宣召。總兵官不得輒入。先是石亨張軌怙寵。干請無算。一日。率千戶盧旺彥敬入侍文華殿。上問爲誰。亨曰：此臣腹心也。迎復功二人居多。立請擢二人錦衣指揮使。工部侍郎孫宏亨鄉人以亨薦得官。復請以爲尙書。上曰：且使侍郎再遷。則尙書矣。亨出曰：一遷尙書。何不可者。乃再遷耶。其驕恣如此。上亦頗知亨。然念其功。閒屏人語大學士李賢。賢對曰：權不可下移。惟獨斷乃可。旣又與賢語及奪門功。賢對曰：迎駕則可。奪門二字豈可傳。示後世。陛下順天應人。以復大位。門何必奪。且內府門甯當奪耶。當時亦有以此事邀臣者。臣辭不與。上驚問故。賢對曰：景皇帝不起。羣臣自當表請陛下復位。此名正言順。無可疑者。何至奪門假事泄。此輩故不足惜。不審置陛下於何地。此輩藉陛下圖富貴耳。豈有爲社稷之心哉。上大悟。寢疎之。十月。李

來近邊求食石亨請領兵巡邊襲之取寶璽以李賢言止不行十一月逮兵部尙書陳汝言下錦衣獄籍其家給事中高明等交章劾汝言怙勢亂法贓私藉甚故逮之上命所司陳藉汝言物於大內廡下召大臣入視且曰景泰閒任于謙久籍沒無餘物汝言未葦得賂多若是耶時上怒甚色變石亨等皆俛召自是上漸悟謙冤而惡亨等矣初謙之死也皇太后不及知後爲上備言迎立外藩之誣上疑之每詰亨軌吉祥等皆對曰臣亦不知徐有貞向臣言耳由是上深惡之軌尋死

二年春正月三大營將石亨曹欽言太僕亟徵諸衛馬非便請隸兵部太僕卿程信執奏言太僕職專馬政高廟有旨馬數不令人知今隸兵部使馬之登耗太僕不與聞脫肘腋變生馬不備給執任其咎兵部懼亦以爲言詔復其事歸太僕夏四月復設督鎮巡撫官初石亨以文官提督軍務武臣不得逞請罷之邊徼騷然軍無紀律上謂李賢曰朕初復位時奉迎之人皆以此爲不便今乃知其謬也

三年春正月大同總兵石彪誣奏都御史李秉坐除名八月定遠侯石彪有罪下獄彪之出鎮大同也禦寇磨兒山斬犯禿王奪其衣甲旗幟大敗之三山墩以功封定遠伯召還其明年寇屯賀蘭山又使彪往彪與寇戰安邊營追至昌平墩大敗之焚馬澗半坡墩轉戰六十餘里斬鬼力赤平章擒獲無算又召還進侯彪至京會北使入貢者見彪於朝羅拜稱石王其威望如此然性陰狡兇暴在大同素侮總兵官總兵官因彪嘗奏城威甯海子遂爲流言稱彪有異志上固疑彪屢有功屢召還彪乃陰使大同千戶楊斌等五十人詣闕乞留爲鎮守上知其詐下彪獄詞連亨上猶念亨功宥之惟罷其兵權令以本籍歸第四年春正月彗星見日暈錦衣指揮遼臬上言石亨怨望與其從孫石俊謀不軌上以章示羣臣遂下錦

衣獄初。亨見上稍疎斥。懷怨望。嘗往來大同。顧紫荆關。謂左右曰。若塞此關。守之。據大同。京師何由得至。一日退朝。歸私第。語盧旺。彥敬曰。吾所居官。皆爾等所欲爲者。旺敬不知所謂。對曰。旺敬以公得至此。他何敢言。亨曰。陳橋之變。史不稱其篡。爾能助吾。吾官非爾官乎。旺敬股慄。莫敢對。會瞽人童先出妖書曰。惟有石人不動。勸亨舉事。亨謂其黨曰。大同士馬甲天下。吾撫之素厚。今石彪在彼。可恃也。異日以彪代李文佩鎮朔。將軍印。專制大同。北塞紫荆關。東據臨清。決高郵之堤。以絕餉道。京師可不戰而困矣。遂請以盧旺守裏河。及李來寇。延綏上命亨往禦之。先又力勸亨。亨曰。爲此不難。但天下都司除代未周。待周爲之未晚也。先曰。時者難得而易失。亨不聽。先私謂所親曰。此豈可與成大事者。會彪敗。上猶念亨功。置不問。罷其兵。而亨之謀漸急。事益露。其家人上變告亨謀反。逮治之。死獄中。斬彪於市。其黨童先等俱坐死。先是。上使工部爲亨營宅。至三百餘間。上登翔鳳樓。恭順侯瑾。撫甯侯永侍。上指宅。顧問。永謝不知。瑾曰。必王府耳。上笑曰。非也。瑾頓首曰。非王府。孰敢上。顧太監裴當曰。人乃不敢言石亨。亨生子彌月。上召見。摩其項曰。虎兒也。善撫之。朕行與卿結婚。姻。取金鎖繫兒項。名曰鎖定侯。蓋諷云。

五年秋七月。太監曹吉祥及昭武伯曹欽反。殺恭順侯吳瑾。都御史寇深。懷甯伯孫鏗。兵部尙書馬昂。率兵討平之。吉祥。欽俱伏誅。方石亨之敗也。上命由亨冒功以進者。許自首。革吉祥。念與亨同功。亨敗。己且不得獨完。因日犒諸降丁。金帛。倚爲腹心。諸降丁亦念己由吉祥冒功進。一旦不測。身且隨後。相與爲死黨。吉祥之客有馮益者。欽一日問曰。自古有宦官子弟爲天子者耶。益曰。君家魏武。蓋中官節之後。欽大喜。出其妻行酒。馮先生由是陰畜異志。未發也。錦衣百戶曹福來。曾役欽。家常之外貿易。欽慮其洩。遣樞

來妻告福來病狂出走。錦衣指揮遂杲奏捕之。欽又遣家人亮追獲福來。篋楚瀕死。廷臣疏勦欽。上是之。出彈文示欽曰：速改過不悛，罪無赦。而下諭廷臣守法，無有專縱似欽者。先是石彪得罪，上亦先諭羣臣。欽以故大懼。又遂杲伺欽甚急，會是月孛來寇甘涼。上使懷甯伯孫鏜統京軍往征之。兵部尙書馬昂監其軍，擇庚子昧爽出師。於是欽與諸昆季其黨都督伯顏也先數十人謀曰：縣官持我急，不發我爲石彪續矣。遂分勒死士番漢軍五百人。約以是日昧爽朝門開，則擁殺鏜，昂奪門入。此時吉祥素所部禁兵且可爲內應，謀定以其夕飲諸降丁酒，厚贈之。酒半夜可二鼓，鏜與恭順侯瑾、廣義伯琮方待漏朝房，都指揮完者秃亮從欽席上亡走見瑾。琮告變，瑾趨告鏜，相與去匿他所。手作奏投門罅，聞上上止開門，絕入吉祥鎖繫之。欽不知也。與弟鉉、鏞、鐸率番將伯顏也先至東長安門，門閉。欽知事泄，卽召死士馳至遠杲門，杲方出，斬之，碎其屍。杲故吉祥黨，被恩遇素厚，後爲上伺欽。欽大恨，都御史寇深亦善欽，旣乃與言官疏勦之。欽亦以爲恨，與鐸馳入西朝房索深，斫深肩，破其身爲兩。時長安街中甲卒馳騁入朝者以爲征西軍也。及訊知各恚散去。大學士李賢待朝東朝房，欽復馳索之。戶外之聲洶洶，賢驚出，則甲而刃者數人，一人砍賢肩傷耳，刃跗擊賢背。少選，欽持遠杲頭來，叱刃者執賢手曰：今日直爲此激變，非得已也。可爲我草疏進上，亡何又執尙書王翱賢，乃就翱所索紙爲草疏，同翱投入長安左門隙，門墜不啓。欽火之，守衛軍折御河之岸，磚以壘門。欽往來嘯呼，擬賢刃者數舍之，馳去。又索馬昂不得。時已昧爽矣。懷甯伯鏜謂其子軌若宏曰：若號於道，有獄賊反獲者得厚賞，征西軍可集也。已稍集至二千人。甲兵具。鏜曰：不見長安門火耶？曹欽謀反，兵少擊殺者予金，皆曰諾。工都尙書趙榮被甲躍馬，奮呼市中曰：能殺賊者

從我。從者亦數百人。鏜之東安門逐賊。欽退屯東華門。鏜接戰。鏜軍銳甚。賊衆披靡。自辰至午。擊斬鏜。欽中流矢。創巨。振策馳。恭順侯瑾將五六騎出。覘賊。猝與遇。力戰死。欽還駐東大市街。相拒至酉。鉉以百餘騎往來馳突者三。官軍環結自潰。鏜執斬潰者以徇。發神臂弓射之。遂追斬鉉。鏜子軌遇欽於道。奮砍中其膊。軌亦死。欽懼。率騎還攻朝陽門。不克。走安定。東直。齊化諸門。門盡閉。大雨。夜竄歸。鏜督兵與戰。馬昂以精兵殿。會昌侯孫繼宗兵又集慶戰。軍士奮呼而入。欽迫投井死。鐸見殺。遂屠其家。親黨同謀一時盡死。捷聞。上以是夕御午門。下吉祥都察院獄。明日磔於市。且追磔欽。鐸。鉉。伯顏也。先馮益湯序伏誅。餘竝流嶺南。有賀三老者。欽妻父也。見欽勢盛。絕不與通。欽嘗欲爲求一官。力辭不可。欽敗。姻黨株連。三老獲免。八月。進伯孫鏜爲懷甯侯。馬昂。王勦。李賢竝加太子少保。完者。禿亮爲都督。將士陞賞有差。追封吳瑾。梁國公。諡忠壯。贈寇深。少保。諡莊愍。以擒賊。詔示天下。布寬卹。開言路。時李賢奏言。曹賊就擒。此非小變。宜詔天下一切不急之務。悉予停罷。又言。自古治朝。未有不開言路者。惟奸邪之臣。惡其攻己。必欲塞之。以肆其非。上曰。此石亨。曹吉祥實爲之。今宜列之於詔。使天下聞知。

谷應泰曰。石亨。石彪驍勇善戰。有隴西李氏之風。使之臥虎北陲。自當匹馬不南矣。帝旣北狩。也。先再薄京師。陵寢崩摧。祭器灰燼。朔騎憑陵。目無中國。于謙督軍九門。亨彪轉戰甚力。德勝。安定。彰義。清風。店。倒馬。關。諸捷。軍聲復振。也。先諸部慟哭出關。旣懼且悔。乃擁還上皇。以結好中國。戰之力也。旣而龍歸興慶。幕徙南庭。亨彪窺伺君側。逆知不起。合謀曹寺。取功奪門。李賢有言。陛下應天順人。門何必奪。當前星已隕。震位久虛。聖敬方躋。乾符奪算。上天垂象。蓋可見矣。卽在景帝憑屨。羣臣憂懼。或心歸沂邸。或意屬襄

藩然而襄王自外入內。憲宗以子先父。則上皇之必能復辟。不待仰步乾象而後決也。一旦挾萬乘之尊。行僥倖之事。乘晦勒兵。登垣掖。駕萬一謀臣不謹。邨邸預知。曹石之肉。其足食乎。邀天之幸。私爲己功。吉祥蒙狐趙之助。亨彪受蕭曹之賞。功以倖成。福以滿敗。當其請官卿貳。建第長安。武安侯之除吏。竇都鄉之沁園。曹石此時。帝固已芒刺在背矣。於時彪鎮大同。亨守延綏。分控要害。屢斬名王。捷聞幕府。帝輒召遣。帝既疑石。石遂自疑。妖言遽興。同悲黃犬。向使石氏無奪門之功。亨彪豈少通侯之賞。積勞汗馬。以功名終。石氏子孫。雖至今存可也。吉祥無尺寸微勞。欽鐸鉉蟬貂簪玉。稍加抑裁。輒生怨望。犯闕稱兵。反形尤著。易著負乘。詩歌相鼠。身族誅滅。固其宜爾。嗟乎。方其論吉祥之功。曹欽身膺五等。未幾論誅吉祥之功。懷甯又進列侯。高帝白馬之盟。唐叔桐圭之賜。稍稍陵遲衰微矣。英宗閒關險阻。再御萬幾。祭則寡人。有同王振。至天順五年。始下詔悔。恨曹石君子以爲不勝其悔也。

卷三十七

汪直用事

憲宗成化十三年春正月。置西廠。命太監汪直。詞刺外事。汪直者。大藤峽獠。獠也。獠賊平。直以幼男入禁中。爲昭德宮內使。尋掌御馬監事。年少黠譎。上寵之。先是。妖人李子龍。以左道惑衆。內使鮑石。鄭忠。敬信之。資緣入內府。時引至萬歲山觀望。謀不軌。錦衣官校發其事。伏誅。自是。上銳意欲知外事。乃選錦衣官校善刺事者百餘人。別置廠於靈濟宮前。號西廠。永樂中。盡僂建文諸臣。懷疑不自安。始設東廠。主刺奸。

至是名西廠以別東廠也。縱直出入分命諸校。廣刺督責。大政小事。方言巷語。悉採以聞。二月。籍沒福建都指揮楊暈家。暈少師榮曾孫也。居鄉逃罪入京師。錦衣百戶韋瑛故無賴。冒內官韋姓者。從征延綏。陞百戶。至是詣汪直報之。謂暈家貲巨萬。常殺人。將招納亡命下海。直喜。發卒捕之。詞連兵部主事楊仕偉。中書舍人董璵。俱下獄。瀕死。暈竟斃。復遣瑛籍其家。三月。左都御史李賓奏擬妄報妖言者坐斬時。西廠旗校以捕妖言圖官賞。無籍者多爲。屢書誘愚民行事者。捕之。加以法外之刑。冤死相屬。無敢言者。故賓奏之。夏四月。汪直令韋瑛執左通政方賢。太醫院判蔣宗武。下西廠獄。禮部郎中樂章。行人張廷綱。使安南還。刑部郎中武清。廣西勘事還。浙江布政使劉福。起復至京。汪直竝令韋瑛執繫之。御史黃本雲。南貴州清軍。刷卷還。汪直令韋瑛搜得象笏一。執送錦衣衛。問爲民。五月。罷西廠時。汪直開西廠。羅織數起大獄。臣民悚懼。大學士商輅疏言。近日伺察太繁。政令太急。刑網太密。人情疑畏。洵洵不安。蓋緣陛下委聽斷於汪直。而直又寄耳目於羣小也。中外騷然。安保其無意外不測之變。往者曹欽之反。皆遼杲有以激之。一旦禍興。卒難消弭。望陛下斷自宸衷。革去西廠。罷汪直。以全其身。誅韋瑛。以正其罪。疏入。上怒曰。一內豎輒危天下乎。太監懷恩傳旨詰責甚厲。輅曰。朝臣無大小。有罪皆請旨收問。直敢擅逮三品以上京官。大同宣府北門鎖鑰。守備不可一日缺。直則一日擒械數人。南京祖宗根本重地。留守大臣直輒收捕。諸近侍直輒易置。直不黜。國家安得不危。恩齧指而退。奏上。上立命去西廠。召懷恩。數直罪。責之。謫韋瑛戍宣府。兵部尚書項忠。削籍爲民。初。汪直掌西廠。士大夫無與往還。左都御史王越因西征識韋瑛。遂深相結。日往伺直。吏部尚書尹旻。偕諸卿。貳欲詣直。屬越爲介。旻既見直。相率諸卿。貳叩頭出。直

大悅。一日項忠途遇直。既過。覺之。追及。下輿謝。忠不爲禮。尋辱忠於朝。復遣校卒直上堂。辭色甚厲。忠亦不爲禮。而王越謀代忠。又毀短之。直以是銜忠。日掇拾其事。危甚。忠具疏倡九卿劾奏直。令武選郎中姚璧持赴。旻署名。旻曰。本項公所撰。當以兵部爲首。璧曰。公六卿長也。旻怒曰。今日亦知六卿長乎。卽遣人報韋瑛。直愈怒。思有以中忠。會千戶吳綬者。先在楚軍。撓法。忠遂綬。綬從直營。求書記。頗工文詞。直喜。得授錦衣副千戶。及西廠罷。上有時密召直。察外間事。直因以吳綬能文事。封進。遂命綬於鎮撫司問刑。直乃嗾東廠官校發江西都指揮劉江。指揮黃賓事。誣搆忠。給事中郭鏗。御史馮瓘附直。交論忠違法。忠廷辯慷慨。不少屈。獄成。竟坐削籍。璧亦降調。璧故尙書夔子也。六月。以御史戴縉。王億言復西廠。命汪直仍刺事。縉言近年災變洊臻。未聞大臣進何賢。退何不肖。惟太監汪直釐奸剔弊。允合公論。而止以官校章瑛張皇行事。遂革西廠。伏望推誠任人。命兩京大臣自陳去留。斷自聖衷。上悅。時縉九年不遷。以覲進。故頌直。其自陳一事。尤直所喜。蓋直常惡商輅。李賓難於施行也。億言汪直所行。不獨可爲今日法。且可爲萬世法。天下聞而唾之。大學士商輅尙書薛遠。董方左都御史李賓竝致仕。以王越爲兵部尙書。兼左都御史。掌院事。時越附汪直。嗾御史馮瓘排諸大臣。輅旣致仕。遠等相繼自陳去。十一月。以御史馮瓘爲大理寺丞。戴縉爲尙寶司少卿。縉尋擢僉都御史。王億爲湖廣按察副使。

十四年夏五月。汪直奏請武舉設科。鄉會殿試如進士例。秋七月。兵部右侍郎馬文升撫遼。尋還京。先是海西兀者都指揮散出哈。上書言開原放管指揮索其珍珠豹皮。命遼東守臣勘之。管指揮者懼。會散出哈。姪產察入貢。指揮賄之。察乃言其誣。散出哈聞之怒。謀聚衆入犯邊。守臣乃譯番書招散出哈來。

廣甯。面質之散。出哈遂率所部欲由撫順關進赴廣甯。時參將周俊守開原。恐散出哈至則事泄。遣使馳報廣甯守臣。詭云海西人素不由撫順進。恐啓他日之患。守臣不虞其詐也。卽阻之。散出哈已入關。聞之大怒。折矢誓恨去。而遼左諸衛故有執殺董山之怨。既藉海西之勢。遂留散出哈相煽結。合兵入邊。勢漸熾。汪直惑於王英。謂往撫可邀大功。上欲遣之。懷恩以直年少喜功。同覃昌至南關。集尙書余子俊。侍郎馬文升議。僉言彼既有使入貢。又屠其家。今若何可以消弭。或言酬以大官。文升曰。官不足以釋其忿。且宋以李繼遷爲京官。遂至西夏之患。懷恩曰。然則遣大臣同大通事往撫之。衆皆曰。諾。既傳旨命馬文升。詹升往。直令王英與俱。文升謝之。直深以爲恨。文升疾馳至撫順。縱貢使重陽還諭其衆。使知朝廷德意。尋召其部長聽宣璽書。慰勞備至。已而海西復縱兵寇掠。文升擊敗之。旋撫定。事聞。直言既受撫。何又入寇。終信王英言。請自往。諸部聞直聲勢久。無一人出聽撫者。直至開原。文升在撫順。直不與之接。於是文升所招兀者野人塔里吉三百餘人皆怒欲歸。參將周俊恐敗事。謂直曰。不可不請馬侍郎來。直乃遣人邀文升。文升馳至。直曰。若之何。文升曰。太監既至此。屬卽太監招出者也。何閒彼此。直揣知事不易。聽文升言。犒之。遂與文升俱歸遼陽。會聞於上。秋七月。江西人楊福僞稱汪直伏罪。福嘗爲崇府內使。隨入京。既而逃還過南京。遇所識者。謂其貌酷似直。福乃詐稱爲直。而所識者卽僞爲校尉。自蕪湖乘傳給廩。歷常蘇。由杭州抵四明。有司及市舶官皆屏息奉命。威福大張。既至福州。爲鎮守太監盧勝所覺。執問如律。

十五年夏六月。命汪直同刑部尙書林聰卽訊遼東事。逮兵部侍郎馬文升下錦衣獄。謫戍重慶。初。陳鉞

巡撫遼東。行事乖方。文升更置之。約束不得動。汪直至遼東。鉞戎服伏道左。除道飾廚。供帳鮮麗。文升獨與直抗禮。頤指左右。左右多譽鉞。毀文升。鉞又乘閒譖之。會給事中張良劾鉞激變屬部。逮至京。鉞賂直言海西。皆以文升禁農器。不與交易。故屢寇邊。直遂奏文升妄啓邊釁。擅禁農器。仍遣直同聰往訊。直謬致恭敬。深自結納於聰。聰上報。竟如直言。然文升所禁鐵器非農器也。秋七月。命汪直行邊。冬十月。遼東巡撫陳鉞請討海西。以撫甯侯朱永爲總兵。陳鉞提督軍務。汪直監之。直既至遼東。有頭目郎秀等四十人入貢。遇直於廣甯。直誣以窺伺。掩殺之。出塞。掩不備。焚其廬帳而還。以大捷聞。論功。加汪直歲祿。監督十二團營。朱永進保國公。陳鉞戶部尙書。已而海西諸部以復仇爲辭。深入雲陽。清河等堡。殺掠男婦。皆支解以徇。邊將斂兵不出。鉞隱匿不以聞。以太僕少卿王宗彝爲僉都御史。巡撫遼東。宗彝故大學士。文子也。以郎中督餉遼東。阿汪直得驟進。

十六年春正月。給事中孫博上言。東西廠緝事旗校多舉細故中傷大臣。旗校本厠役之徒。大臣乃股肱之任。傷國體。非治世事。疏入。切責。三月。命太監汪直保國公朱永尙書王越率兵出塞。襲敵於威甯。破之。越封威甯伯。夏四月。巡按遼東御史強珍上疏劾太監汪直總兵侯謙。巡撫陳鉞前失機隱匿罪。於是都給事中吳原。御史許進等亦以鉞爲言。比之黃潛善。賈似道。詔罰鉞俸。鉞因怨王越。掌院事縱珍。而汪直適巡邊還京。鉞郊迎五十里。訴珍承越意。旨見劾。直怒。越亦來。迓不見。越巡撫遼東。王宗彝遂阿直。意誣珍妄奏。械珍至京。下錦衣衛獄。戍遼東。秋七月。汪直議征安南。時安南累歲侵擾。占城。占城遣使入奏。請討之。直因獻取安南之策。郎中陸容上言。安南臣服中國已久。今事大之禮不失。叛逆之形未著。

一旦以兵加之。恐貽禍不細。直意猶未已。傳旨索永樂中調軍數。時劉大夏在職方。故匿其籍。徐以利害告。尚書余子俊力言沮之。事乃寢。

十七年秋八月。亦思馬因寇大同。以威甯伯王越佩征西前將軍印鎮守。太監汪直監其軍。冬十月。巡撫宣府都御史秦紘密疏汪直縱旗校擾民。上釋之。紘既抵宣府。直亦以事至。聲勢烜赫。他巡撫官率屈禮。紘獨與抗。直亦不爲較。紘乃密疏論直後直還。上問各撫臣賢否。直獨稱紘廉能。上以紘疏示直。直叩頭伏罪。稱紘賢不置。

十八年春三月。復罷西廠。先是有盜越皇城入西內。東廠校尉緝獲。太監尙銘以聞。上喜甚。厚賜賚。直聞怒曰。銘吾所用。乃背吾獨擅功。思有以傾之。銘懼。潛以直構禍事達於上。上自直行後。李孜省用事。萬安結昭德宮。頗攬權。惡直浸淫。上亦漸疎之。於是科道交章奏西廠苛察非國體。萬安亦謂宜罷。劉翊不可。上竟罷西廠。中外欣然。翊有慚色。秋八月。調威甯伯王越守延綏。都督許甯代。時萬安恐汪直爲越所誘。求復用。故有是調。

十九年夏六月。調汪直南京御馬監。直與總兵許甯不協。巡撫郭鏜以聞。故有是命。方直之貴盛也。車蓋所至。有司迎候不及。動遭箠撻。率皆預治具。夙戒以待。使僕從皆醉飽。直然後悅。至是被調。過州縣。有司皆避之。直困頓。臥公館。孤燈熒然。有知州裴泰者。向供具甚肅。且備適迎謁。上官遇直。直喜求食。曰。吾非復前比矣。吾南行。上意未可測。且日發得馬夫足矣。泰拱手而立。秋八月。御史徐鏞上疏劾汪直欺罔罪。曰。汪直與王越。陳鉞結爲腹心。自相表裏。肆羅織之文。振威福之勢。兵連西北。民困東南。天下之人

但知有西廠而不知有朝廷。但知畏汪直而不知畏陛下。漸成羽翼。可爲寒心。乞陛下明正典刑。以爲奸臣結黨怙勢之戒。上深納其言。汪直有罪罷。削王越威甯伯。追奪誥券。編管安陸州。兵部尙書陳鉞。工部尙書戴縉。錦衣指揮使吳綬。革職爲民。起前兵部尙書項忠。復其官。召還馬文升。以爲左副都御史。巡撫遼東。初。汪直用事久。勢傾中外。天下凜凜。有中官阿丑善談諧。恆於上前作院本。頗有譎諫風。一日。丑作醉者酗酒狀。前遣人佯曰。某官至。酗罵如故。又曰。駕至。酗亦如故。曰。汪太監來。醉者驚迫帖然。旁一人曰。駕至不懼。而懼汪太監何也。曰。吾知有汪太監。不知有天子。又一日。忽效直衣冠。持雙斧趨蹌而行。或問故。答曰。吾將兵。惟仗此兩鉞耳。問鉞何名。曰。王越。陳鉞也。上微哂。自是而直寵衰矣。及其罷斥。中外莫不快之。尋尙銘亦有罪。黜籍其家。得貲數萬。輦韋瑛謫萬全衛。計要功起用。自撰妖言。誣巫人劉忠。與十餘人不軌。會鞫得白。瑛伏誅。

谷應泰曰。有明百餘載。海內乂安。朝野蒙業。太阿潛移。刑人執柄。中官之禍屢作。至憲宗命汪直設西廠。喟然廢書嘆曰。嗟乎。法之涼也。國制亂矣。夫千尋之木。必有壞枝。徑尺之璧。必有微瑕。故黈纁塞聰。垂旒蔽明。山澤納汚。國君含垢。媿張武之金錢。隱河東之酒過。所以匿疵呈瑜。鼓策羣力也。國武好言人過。君子知其見殺。隋文苛細繩。下識者陋其貽謀。乃欲刺事暮夜。訶人牀第。方言巷語。競入宸聽。瓜蔓枝連。立成大獄。不知竹筩鉤鉅。賢吏薄之。謂其行衰俗惡。況以萬乘之尊。行攻訐之智乎。而且委柄匪人。寄權近寺。招致奸民。顯行繫械。其始也。李膺破柱。將閭呼天。因而權歸北寺。獄奏黃門。禍發清流。慘同白馬。繼也。薑桂皆鋤。脂韋成習。呈身宮掖。屈膝私人。中官勢成。而主上孤立矣。憲宗躬法桓靈。養姦甫節。卿貳大臣。

率皆收問。局司近侍。直得更張。檻車逮治。南署空曹。緹騎行邊。北門不守。明世中人。多竊寵靈。亦未有顯。挈利器。授人斷割。如憲宗者。昔高皇帝罷錦衣衛獄。焚其械具。垂示子孫。刑人於市。以明大公。勿幽置禁。闕。委命奄嬖也。西廠繼能。弊不復革。瑾讀直書。魏傾善類。至懷宗手平內亂。晚年東廠羅捕無遺。商鞅治。秦道無偶語。元濟竊蔡。火不夜然。斯亦酷吏哀痛之風。衰國亂亡之漸也。彼汪直以大藤峯賊。幼畜禁中。不思日碑寶瑟之忠。妄有祿山赤心之詐。酷好用兵。輒開邊釁。海西一獄。幾激降人。而垂羽北陲。邀功南。服。不知南海明珠寂寥久矣。馬文升撫順推功。劉大夏安南焚籍。大臣之委蛇人國。固如是也。阿丑談諧。悟主談笑。除姦覃懷。乃心王室。倚毗正人。夫亦寺人女子之流。淳于優孟之智也。與談言微中。說人主者。又何可不察也。

